


Երեսնյա այսպիսին

ՄԱՅՐ ԱՅՈՒՆ ՍՈՒՐԲ ԷԶՄԻԱՏՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի ուղերձը Բանակի օրվա առիթով



Բանակի նվիրական օրվա առիթով հայրապետական Մեր օրհնությունն ենք բերում Հայոց բանակի հրամանատարներին ու զինվորներին և համայն մեր ժողովրդին:

Արցախյան շարժման օրերից կանախորական ջոկատների և զինապարտների միավորումով կազմավորվեց հայոց կանոնավոր բանակը, որն ավելի քան երեք տասնամյակ, Արցախյան պատերազմների և Հայաստանի սահմաններին Ադրբեջանի սանձազերծած ռազմական գործողությունների ընթացքում մարտնչեց անօրհնակ սխրանքներով: Բազում քաջություններ անմահացան՝ ընդունելով հանուն հայրենիքի նահատակության պատիվ:

Միևեկին, մեր տարածաշրջանում տիրող բարդ իրադրության մեջ առաջնային է Հայոց բանակի համակողմանի հզորացումը: Մեզ պատած աղետալի ողբերգությունների, Արցախի բռնազավթման հանդիման՝ բոլորիս ջանքերով ըստ ամենայնի պիտի

աստարենք մեր բանակին, քանզի Հայոց բանակը երաշխավորն է մեր ժողովրդի խաղաղ ու արժանապատիվ կյանքի, ապահով գալիքի ու հայոց անկախ պետականության: Գոհությամբ ենք հաստատում, որ մեր հոգևոր սպասավորները հովվական խնամքի համար եղել են և լինելու են Հայոց բանակի սպաների ու զինվորների կողքին, որպեսզի զորացնեն ոգին մեր քաջարի մարտիկների և ամուր պահեն նրանց հավատքն ու հույսն առ Աստված:

Այսօր մենք մտահոգ ենք աշխարհում առկա լարված ու պատերազմական իրավիճակի՝ մասնավորապես մեր հայրենիքի շուրջ ծավալվող իրադարձությունների, մեր պետության նկատմամբ դրսևորվող նվաճողական նկրտումների պատճառով: Հավատն ունենք, որ Աստծո օգնությամբ, ուժեղ բանակով և համագգային միաբանությամբ կարող կլինենք դիմակայել մարտահրավերներին

և հաստատել մեր պետության և աշխարհապետ մեր ժողովրդի լուսավոր գալիքը:

Եռաբլուրում՝ հայրենիքի սրբազան հողում ամփոփված մեր նահատակների քաջարի սխրանքը և լույս հիշատակը թող մեզ համար դառնան սրբազան ավանդ՝ աննվազ պահելու հայրենյաց սերը և նվիրումը, մեր ցավն ու վիշտը դարձնելու ուժ ու վճռակալություն՝ հանուն մեր հայրենյաց շենացման ու բարգավաճման:

Բանակի այս նվիրական օրը աղոթում ենք հանուն հայրենիքի գոհված հերոս հայրդիների հոգիների հանգստության համար և հայցում շուտափույթ վերադարձ գերյալ հայրդիներին ու անհայտ կորածներին: Թող Տերը խաղաղ ու անվտանգ ծառայություն շնորհի մեր զինվորներին ու սպաներին և Էր խնամքի ներքո օրհնի ու պահպանի հայրենի մեր երկիրը և աշխարհապետ համայն մեր ժողովրդին այսօր և միշտ. ամեն:

Բանակի օրվա առիթով Սուրբ Պատարագ և Հանրապետական մաղթանք Մայր Աթոռ Սուրբ Էջմիածնում

Նունվարի 28-ին, Ն. Ս. Օ. Տ. Տ. Գարեգին Երկրորդ Ճայրագույն Պատրիարք և Ամենայն Հայոց Կաթողիկոսի օրհնությամբ, Սուրբ Գայանե վանքում Հայոց բանակի օրվա կապակցությամբ մատուցվեց Սուրբ Պատարագ: Պատարագիչն էր ՀՀ ՁՈՒ հոգևոր առաջնորդ Ս. Մովսես վրդ. Սարգսյանը:

Իր քարոզում հայր սուրբը, անդրադառնալով խաղաղության խորհրդին, ի մասնավորի նշեց. «Սուրբ Գիրքը մեզ սովորեցնում է, որ Աստված խաղաղություն է կամենում, սակայն Աստծուն հավատացող մարդիկ են, որ պիտի խաղաղություն հաստատեն՝ անհրաժեշտության դեպքում նաև պայքարելով»:

Ըստ հայր Սովսեսի՝ Սուրբ Եկեղեցին փաստել է, որ հանուն խաղաղության՝ միշտ պետք է պատրաստ լինել պատերազմի ու պատերազմ պետք է մղել հենց խաղաղությունը վերահաստատելու և արդարությունը վերականգնելու համար, որովհետև Աստծո և բարեկամի նկատմամբ սերն ստիպում է քրիստոնյաներին արդարացի խաղաղություն փնտրել, իսկ այդ խաղաղությանը հասնելու համար ամենակարևոր պայմանը բանակն է:



«Միևեկին, հանուն խաղաղության ու անվտանգության բազմաթիվ պատերազմներ մղած ու այսօր էլ պատերազմի սպառնալիքներին դիմակայելու պատրաստ Հա-

յոց բանակը տոնում է կազմավորման 32-րդ տարեդարձը, և բանակն է շարունակում մնալ այն միակ ուժը, որը կարող է խաղաղություն հաստատել ու ապահովել պետու-

թյան անդորրը: Մեր երկրի համար Աստծո պատգամած խաղաղությունը հաստատողն ու պարտադրողը ՀՀ Զինված ուժերն են, իսկ երանելի խաղաղարարները՝ այդ նույն զինված ուժերի հավատացյալ սպաներն ու զինվորները: Տեր Հիսուս Իր կյանքը տվեց որպես խաղաղարար, և սա այն զինն է, որ շատերը վճարեցին մեր երկրում խաղաղություն հաստատելու համար», - ընդգծեց Սովսես վարդապետը՝ մաղթելով, որ Քրիստոսի սերը, շնորհներն ու զորակցությունը միշտ լինեն Հայոց բանակի հետ և յուրաքանչյուր զինծառայողի պարզևե՛ն ամեն վայրկյան խաղաղությունը պարտադրելու կամք ու վճռակամությունը:

Պատարագի սրբազան արարողության ավարտին, հանդիսապետությամբ Մայր Աթոռ Սուրբ Էջմիածնի դիվանապետ Ս. Արշակ արք. Խաչատրյանի, կատարվեց Հանրապետական մաղթանք, որի ընթացքում հոգևոր դասը և արարողությանը ներկա հավատացյալ ժողովուրդն արդթք բարձրացրին առ Աստված՝ Հայաստան աշխարհի խաղաղության, անասանության և Հայոց բանակի հաղթական առաջընթացի համար:



Մայր Աթոռի միաբաններն այցելեցին «Եռաբլուր» պանթեոն

Նունվարի 28-ին՝ Հայոց բանակի օրվա կապակցությամբ, Ն. Ս. Օ. Տ. Տ. Գարեգին Երկրորդ Ճայրագույն Պատրիարք և Ամենայն Հայոց Կաթողիկոսի օրհնությամբ, Մայր Աթոռ Սուրբ Էջմիածնի միաբաններն այցելեցին «Եռաբլուր» զինվորական պանթեոն՝ հարգանքի տուրք մատուցելու հանուն հայրենիքի պաշտպանության նահատակված հայրդիների հիշատակին և աղոթք բարձրացնելու նրանց հոգիների հանգստության համար:



Պարույր Սևակ — 100



* * *

Իմ նախնիների ազգանվանը սերնդեսերունդ կպած է եղել Տեր-ը, որ հոգևոր դասի տիտղոսն էր: Իմ պապերը սաներն են եղել Էջմիածնի հռչակավոր ճեմարանի, որ տալիս էր, ինչպես որոշակի գիտեն հիմա, արդի համալսարանի բանասիրական բաժանմունքից ոչ պակաս կրթություն: Նրանք երկհարկանի տուն են ունեցել՝ նկուղով և պատշգամբներով: Բայց 1918—1921 թվականներին մեր գյուղացիք ստիպված են եղել երեք անգամ լքելու իրենց տուն ու տեղը: Եվ եթե իմ պապերի հսկայական գրադարանից մնացել էր միայն «Նարեկը»՝ հրդեհի սպին կաշվե դեմքի վրա և որբացած՝ զրկված ընթերցողից, ապա նրանց երկհարկանի տնից էլ մնացել էր լոկ այն, ինչ չի վառվում՝ գետնափոր նկուղը: Այնտեղ են ծնվել ես 1924 թվականի հունվարի 26-ին:

«Անցյալը ներկայացած»

* * *

Իմ գիտակցական ամբողջ կյանքում ես տառապել եմ, եթե կարելի է ասել, կոմիտասասիրությունից:

«Անցյալը ներկայացած»

* * *

Գրել Կոմիտասի մասին հավասարազոր էր գրել հայ ժողովրդի վերջին 100 տարվա պատմությունը՝ ժողովրդի կյանքով ու երազանքներով, կենցաղով ու գոյամարտով, երգերով ու լացով, եվրոպական դիվանագիտությամբ ու թուրքական բարբարոսությամբ, ազգագրությամբ ու ազգագիտությամբ, անցյալով և ապագայով:

«Անցյալը ներկայացած»

* * *

....Այսօր, 16-դարյա մի բարձունքից նայելով, Մաշտոցը մեզ երևում է նախ և առաջ իբրև մի վիթխարի քաղաքագետ, որի շահած անարյուն ճակատամարտի հետ չի կարող համեմատվել մեր սպարապետների փառավոր հաղթանակներից և ոչ մեկը:

«Թրի դեմ՝ գրիչ»

* * *

Արդեն միայն Աստվածաշնչի թարգմանությամբ հայոց լեզուն կատարեց իր փառատունը՝ ապացուցելով, որ ի գորու է լիապես արտահայտելու ինչպես պատմություն, այնպես էլ օրենսդրություն, ինչպես հրապարակախոսություն, այնպես էլ բանաստեղծություն, ինչպես բուսական ու կենդանական աշխարհ, այնպես էլ երևակայություն-տեսիլք և կանխատեսություն-մարգարեության, որովհետև հին եբրայեցոց «Սուրբ գիրքը» իսկապես մի Ամենամատյան էր գիտության և արվեստի բազուն բնագավառների:

«Թրի դեմ՝ գրիչ»

* * *

Նա նման չէ նույնիսկ... Արարատին, որ հեռավորության ու միջոցի մեջ նույնպես փոքրանում է:

Նա նման է... հորիզոնի. որքան հեռանում ես իրենից, նույնքան մոտենում է ինքը, և ինչքան մոտենում ես իրեն, այնքան հեռանում է նա՝ մնալով միշտ անհաս և անմատույց, երբեք չփոքրացող և միշտ բացարձակվող: Ուստի և իր հանդեպ մշտարժարծվող մեր զգացմունքը հար և նման է իր իսկ զգացմունքին առ աստված. «ՀԵՏԱՊՆԴԻՄ ԵՄ ՈՒ ՉԵՄ ՀԱՍՆՈՒՄ»: Ուստի և նա, ահավասիկ ավելի քան մեկ հազարամյակ, իր երկրպագուների համար մնում է նույնը, ինչպիսին էր իր համար իր երկրպագյալը. «ԱՆՄԱՏՉԵԼԻ ՀԵՌԱՎՈՐ ԵՎ ԱՆԸՆԴԻՄԻՋԵԼԻ ՄԵՐՁԱՎՈՐ»:

«Գրիզոր Նարեկացի»

* * *

Միայն մի քանի Տաղով Նարեկացին կդառնար մեր առաջին մեծ բանաստեղծը: Բայց նա կերտեց նաև իր «Մատյան»-ը, որը մեր բանաստեղծության Աղթամարա վանքն է՝

լոկ այն զանազանությամբ, որ «Մատյանն» անկործանելի է ստուգապես:

Գրքերն էլ ճակատագիր ունեն, որ բնավ էլ նրանց վերնագիրը չէ: Եվ «Մատյան»-ի ճակատագիրը նույնքան անկրկնելի է, որքան իր էությունն ու հորինվածքը....

Լինելով մեր հին գրականության ամենից շատ հրատարակված և հայ ժողովրդի մեջ ամենատարածված գիրքը, իր բազմաթիվ վերնագիր-անվանումների փոխարեն կոչվելով պարզապես «Նարեկ»՝ բանաստեղծության այս արտակարգ և անզուգաբախտ հատորը ոչ այնքան ընթերցվել է, որքան համբուրվել, դրվել ոչ այնքան դարակի կամ գրակալի, որքան հիվանդի ճակատի վրա կամ բարձի տակ, ոչ այնքան հասկացվել, որքան զգացվել, ոչ այնքան գնահատվել, որքան պաշտվել: Եվ զարմանալին այն է, որ Նարեկացին հենց ինքն է դա կանխագուշակել իր գրքի սկզբում. «Այս մատյանն ընթերցողների սրտերը դարձրու հստակ, բժշկիր նրանց հոգիները և հանցանքները սրբիր... Եթե անձնական ցավի մի մահացու վտանգ պաշարի որևէ մեկին՝ թող սրանով գտնի փրկությունը հույսով ապրելու»...

Նարեկացու կանխագուշակումը կատարվեց: Ու եթե ժողովուրդներն իրենց մեծ բանաստեղծներին անմահացնում են համարյա միատեսակ, ապա հայ ժողովուրդը իր այս մեծին անմահացրել է նույնքան արտակարգորեն, որքան արտակարգ էր նույն ինքն այդ մեծը. դարեր շարունակ նրա գիրքը համարվել է ՀՐԱՇԱԼԻՔ, և դարերն ապացուցեցին, որ իսկապես էլ հրաշալիք է դա...

«Գրիզոր Նարեկացի»

* * *

Նրան բնութագրող առաջին ածականը պետք է լինի ԱՍՏՎԱԾԱԽՈՒՅՁԸ: Բայց նա Աստծուն հետախուզում է ոչ թե պարզապես ի սեր Աստծու, այլ հանուն Մարդու: Ուստի և նա մեկն է աշխարհիս այն սակավաթիվներից, որոնց մականունն է ՄԱՐԴԱԽՈՒՅՁ: Նա մեր առաջին մարդագիրն է և մեծագույն մարդերգուն: Ուստի և նա, ըստ էության, մեծատառ է գրում ոչ միայն Մարդը, այլև ՈՒՄ-ը: Մեսրոպատառ ոչ մի գրքում մարդն այնքան չի մերկացվել ներքնապես, որքան այստեղ: Ըստ քրիստոնեական հավատալիքի, Ահեղ Դատաստանի օրը մարդկանց կառուցվածքը շրջվում է, մարմինը դառնում է աստառ, հոգին՝ երես: Իր գրքում այսպես է շրջված ոչ միայն Մարդը, որ ինքն է, այլ նաև Ոմն-ը, որ մարդկային արարածներից յուրաքանչյուրն է:


«Գրիզոր Նարեկացի»

Ձայնիվ երկրորդ առ տեր կարդամ

Թողություն տուր, Տեր, ծանր խավարին, Միայն թե թող Նա թողնի հեռանա: Թող ծառերն անգամ (առանց և քամու) Հարգանքով Նրա առջև կեռանան, Միայն թե թող Նա թողնի հեռանա: Մենք պահանջ չունենք, Մենք գոհ ենք նույնիսկ, Միայն թե թող Նա թողնի հեռանա: Մենք խոստանում ենք, Եվ մենք իսկապես Նրան չենք կարող ու չենք մոռանա, Միայն թե թող Նա թողնի հեռանա...

Իսկ թե հարկ լինի, նամանավանդ պետք, Ես խավարի հետ կմեկնեմ Ինքս՝ Դառնալով Նրա թագավորության Հին Հպատակն ու նոր Քաղաքացին՝ Անդարձ կմեկնեմ խավարի հետ Ես, Միայն թե մեր այդ մեկնումից հետո ժամանի ինքը՝ Արշալույսը, Գա, Ու եթե մի քիչ տխրի, որ չկամ, Բայց մի քիչ հետո Եվ ուրախանա, որ իմ կորստով Կորել է նաև ինքը խավարը...

Արշալույսը գա, Եվ իր կտրված պորտից պոկվելով՝ Նորածին օրը ալ-կարմիր շնչի Եվ ինքն էլ զգա, Որ իր այդ շնչով խոնավ ու տաքուկ Այնպես է լցվում աշխարհը կրկին, Ինչպես տկճորը արմազույմ գինով, Եվ այդ լցումի թրթիռը հսկա Մանրիկ անցնում է մեր իսկ ներքինով՝ Իբրև մի սարսուռ, Որ մեզ կապում է ամտես կապերով Աստվածների հետ, Դարձնում նրանց հետ մեզ հարաբերող, Բայց և առնչում մեզ օվկիանոսներին, Որոնց անվախճան ու տարուբերող Մակընթացություն-տեղատվությունն Այլ բան չէ արդեն, Քան թե աննշան մեր զարկերակի Նշանակալից արձագանքը մեծ Մեզնից սկսվող տարածության մեջ...



Պարույր Սևակը Վազգեն Ա Ամենայն Հայոց Կաթողիկոսի հետ

Բարեխոս եղիր իմ և իմ միջև

Օգնիր ինձ, Մարիամ, Անադարտ մնամ Այն ճահճանման աղտ-աղարտի մեջ, Որ դժգոհություն բառով է կոչվում: Դժգոհությունից ես շատ եմ դժգոհ: Օգնիր ինձ, Մարիամ, Եվ ասեմ ինչնրվ. Բարեխոս եղիր իմ և իմ միջև, Որ բանն ավարտվի ինքնահաշտությամբ: Ես խռովել եմ նաև աշխարհից. Եկ ու վերստին հաշտեցրու դու մեզ, Թե չէ ես այսպես ապրել չեմ կարող: Ուզում եմ նայել ինձ ու աշխարհին Լիացած, ժպտուն ու գրի աչքերով՝ Հաղթելով և՛ քաղց, և՛ պապակ-փափագ: Ուզում եմ ապրել անչար ու բարի՝ Գմբեթի ճեղքում բուսած տուղտի պես... Մի բու թառել է իմ զույգ աչքերին. Թռցրու նրան: Մի ձու սպիտակ ինձ բիբ է դարձել. Կորցրու այդ ձուն: Ծանճեր են մստած ինձ վրա Այնպես, Ինչպես քունջութը՝ կաթնահունց հացին: Ծանճը քունջութ չէ. Հացս չի՛ ուտվում: Ծանճով է լցված իմ ներսը նաև, Ինչպես վարսանդը՝ խաշխաշի սերմով: Խաշխաշ չեն ուզում. Կականչ դարձրու: Ասում եմ, իբր, կապույտի վրա Չեն մստում ճանճեր: Լսում ես, Մարիամ, Ինձ ներս ու դրսից կապրյտ հագցրու...

Եվ այդ մի՝ Մաշտոց անուն

(հատված)

Նրանց ծնունդը միշտ էլ թվում է անսպասելի Եվ հետո մարդկանց դարեր շարունակ զարմանք պատճառում, Բայց նրանք կյանքում միշտ էլ ծնվում են լոկ այն պատճառով, Որ անչափ շատ են սպասել Նրանց:

Ժողովրդի մեջ մնում են Նրանք, Ինչպես ջրի մեջ՝ ահեղ գոլորշին, Ինչպես ընտանի աքաղաղի մեջ՝ Իր իսկ երբեմնի թռչունությունը, Ինչպես մանուկի պարապ բերանում՝ Ակռա-ատամը:

Նրանք ծնվում են իրենց ծնողի անօգնությունից, Որպեսզի դառնան նոր գորեղություն: Նրանք ծնվում են ինչ-որ հանճարեղ մի հոգնությունից, Որպեսզի դառնան հանճարեղություն: Նրանք ծնվում են, որ ապացուցեն, Թե վերջը մի տեղ դառնում է սկիզբ:

Նրանք ծնվում են, որ ապացուցեն, Թե հրաշք չկա, Կա միայն կարիք: Նրանք ծնվում են, որ ապացուցեն, Թե այնտեղ է լոկ սխրանքն սկսվում, Ուր վերջանում է ամեն մի հնար...

Հայորդու բարոյատիպը Ատոմ Յարճանյանի ռազմերգության մեջ

Ատոմ Յարճանյանի ստեղծագործ հանճարը նույն-քան փառահեղ կարող էր լինել խաղաղության արշալույսների օրհներգության մեջ: Ազատության մեջ երբեմն ծաղկող կյանքի տառապագին կարոտի, գեղեցկության վսեմ արարումների, հեռվում թողը-ված հայրենական ամուլ դաշտերի պաղատանքի, հորովելի արդար կանչի ստեղծագործ ոգևորությու-նը որքան էլ այցի գնար նրա բանաստեղծական հզոր տարերքին, հայրենիքի արյան շառագույնը, վերս-տին խուժելով, տիրական պիտի դառնար նրա պոե-զիայում: Կյանքի բանաստեղծական գերզգացողու-թյունն անթեղելով հոգում՝ Յարճանյանն իր հանճարն ընծայաբերեց ազատության պայքարի գաղափարին՝ իրեն ներհատուկ գեղապաշտության պոեզիայի տեղ բերելով ռազմի դուրսագնաց հեղ ռզին, ազատության համար կյանքով սխրագործելու, ազգային պար-տադրվող մահը հերոսացումով հաղթահարելու գա-ղափարն ու կամքը՝ արարելով բանաստեղծության արժանավայել մի տեսակ՝ ռազմի պոեզիա կամ ռազ-մերգություն:

Բախտը Յարճանյանին օժել էր բանաստեղծական հանճարով, ճակատագիրը սահմանել էր լինել կոտո-րածի և մաքառումի բանաստեղծ: Կյանքի փթթում զգայություններն անթեղած ազգային ճակատագրի ող-բերգությունը դարձավ Յարճանյանի ռազմերգության ներքին առանցքը, ազգային գոյաբանության խնդիրը՝ կյանքի գերնպատակը, ջարդերի տեսիլները՝ ներհո-գեկան շղթան:

Առաջին գիրքը՝ «Դյուցազնորեն»-ը, ահազանգում էր արիասալու, մաքառելու կամ անգեմ, կրավորական մահատակվելու հարցարդումը: Անընդմեջ կոտորած-ները, պետականության բացակայությունը, թուրք բռնա-կալության դարավոր լուծը ազգային հոգեկառուցվածքում պատմականորեն ձևավորել էին պարտվողական-կրավո-րական հոգեբանություն, և «Դյուցազնորեն»-ը հերոսացումի ռազմական էր, որ բերում էր սխրագործելու ազգային գի-տակցության գաղափարը, կայծի պես բռնկվող հերոսացում-ներն ու ցեղի դիմադրողականության ներուժը ժողովրդակա-նացնելու հոգեբանությունը, հոգևոր ստրկության փոխարեն դյուցազնորեն կռվելու կորովը: Շարքի գաղափարական հե-րոսը, որ հանդես է գալու մահ «Հայորդիներ» գրքում, բարո-յապես մախանձելի, աստվածավայել հայորդին է, որը պի-տի հեղաշրջի ցեղի և երկրի ճակատագիրը: Բանաստեղծի սքանչացումն առ հայորդու բացարձակ նվիրումը, սրբազ-նագույն ցավն ու աստվածաբժան սխրամբը նույնացնում է նրան ասպետի կերպարին:


Բանաստեղծական ճանապարհի սկիզբը խորհրդա-շում է «Հույսին ճամբան» բանաստեղծությունը՝ մախանձե-լով ազգային գոյաբանության մաքառումի ուղին:

Եթե կուզես, Տառապանքը, դարերուն համար, քանդակե,
Բայց մի մոռնար, Անոր աշվներն ու բերանը ու հոգին,
տարփորեն,
Ընդվզումի ստինքներուն կարկառելու...

Ներքին տարածության մեջ բացվում-վերափոխվող-վում են Հույսը, Ցավը, Տառապանքը, Մահը, Երազը, Դյուցա-զունը, Արյունը, Եղեռնը, Երդունը: Կերպավորվում են հույ-սի ռահվիրաները՝ «Ընթրստացումներու ապառաժներեն իրենց ճակատներն արյունած, // Բայց աշվներեն ամասելի արիավիրք մը արձակելով»: Ազգային կենսունակությու-նը, ֆիզիկական և հոգևոր գոյությունը, ըստ Յարճանյանի, ընդվզումն ու մաքառումն են վճռում, ոչ թե հարյուրամյակ-ների տառապանքն ու հոգևոր ստրկությունը: «Սա փայլակն սուրը կտրիճորեն ձեռքդ առ»,— այս է ազգային կեցության միակ ճանապարհը, որպեսզի վերջապես «...Երազին ձիերը փոթորկանման // Մեր կամքին ձեռնըներեն դյուցազնաբար վարվելեն» // Հաղթանակին կատարները արձանանան...»: Հույսի ճամփան առաջնորդող ընդվզումից, անվերջ կոտո-րածներից լեռնացած ընթրստացումից պետք է կռվի-կռվի ազատությունը: «Ընդվզ տվեք, որ ձեր ամեն մեկուն պատյա-նեն մերկացած սուրը պողպատ // Սա մեր քարուտ ու դա-ժան, ու մութ ու անողորմ ճամփան» // Ծիածանի մը հանգույն մինչև Նպատակը լուսավորեն...»:

«Երևակայությունը,— գրում է Դանիել Վարուժանը,— Սիա-մանթոյի տաղանդին ամենեն տիրական գիծն է... Կիկլոպ մըն է քերթողը. այն սարսափելի աչքը՝ զոր աստված իր լու-սեղեն մատով բացած է ըղեղին վրա. թե խոշորացույց մըն է և թե գեղադիտակ մը, որ ամեն բան կը տեսնե հսկայական համեմատությամբ: Երևակայության միացած գաղափարա-կանը՝ հռետորությունը կը ծնի. երևակայության միացած զգացումը կը ծնի վսեմը: Յարճանյանի արվեստը արդյունք է այս երկու զուգավորություններուն»: Կոտորածների հոգե-վարքի մեջ Սիամանթոն բերում է ոչ թե մահվան դատա-պարտվածի հոգեբանությունը, այլ վերածնության կամքը, ոչ թե հոգեբանական պարտությունը, այլ պայքարի հրա-վերը: Հայրենիքի մահատակների՝ որդիների ժառանգած սրբությունը իրենց գաղափարն ու գործն է, հայ մայրերն արարում են ազատապաշտ, հայրենազոհ սերունդներ, մա-հատակված հայրերի վերածնությունը սերունդի պայքարի և նպատակի հաղթանակի մեջ է:

Ո՛վ դուք, որ մեր մարմարե կողերուն մայրութենեն ստեղծ-վեցաք,



Հայկ Նահապետի արձանը, քանդակագործ՝ Կառլեն Նուրիջանյան, դրվագող՝ Գասպար Գասպարյան, 1970 թ.

Ձեր կյանքին առջև փակ աշվները սա լույսերովը ոռո-գելեն՝

Խմեցեք մախ այդ արյունեն, որ արյունն է ձեր փառավոր հայրերու,

Ու հետո ամեն օր մեր առույգ ստինքներուն կաթը աստ-վածային,

Ձեր ամեն մեկը պիտի ըմե այնպես, ինչպես որ ձեր հա-րերը մեզի համար

Սա դաշտերուն մեջը անձնուրացորեն եղան...

Սիամանթոն ցեղի ուժի և ցեղի արժանապատվության քերթող է. «Արդարությունը ստեղծել պետք էր և ազատությու-նը մոլեգնաբար հափշտակել»,— հռչակում է բանաստեղծը: Հույսին համալրում է վրեժը, «Դյուցազնորեն»-ին՝ «Հայոր-դիները»: Հույսը մշտապես կենսունակ է պահել ազգային կեցության ուղին, վրեժխնդրությունը՝ ազգի գոյաբանության ոգին: Վրեժի մեջ վեհագույն, հոգեբանորեն ազատապաշտ, բարոյապես անձնագրի հայորդին է Սիամանթոյի պոեզիայի գաղափարակիր հերոսը, հայրենիքի ազատությունը՝ քաղա-քական իդեալը, հոգեբանական իդեալը՝ «Քիչ մը լույս, քիչ մը կյանք, քիչ մը սեր և քիչ մը երազ» տառապալ և խռովյալ սերունդների համար:

Հույսերու երկաթե սանդուխին կատարներեն է, որ
ավետիսս կ'արձակեն,
Մոխիրներու, դիակներու և վշտերու հովիտներեն է, որ
հասա ի քեզ,
Եվ, ավա՛ղ, քղամիդիս թեզանիքներեն իմ շքեղ ցեղիս
արյունը ահավասիկ դեռ կը թորա...
Բայց քայլերս անխոնջ են, և կամքս՝ գերազոր, և ձայնս
դաժանորեն ամեհի...

«Նպատակն է թելադրում գերագույն պարտականություն-ներ,— ասում է Նժդեհը,— մա պահանջում է ճիգեր ու զոհո-ղություններ, որոնց մեջ կոփվում են անհատի և ժողովրդի լավագույն առաքինությունները, որոնց կատարումը, Աքիլ-լեսի միգակն մման, բուժում է իր հասցրած վերքերը»: Յար-ճանյանի պոեզիայի գաղափարաբանությունը Նժդեհի ուս-մունքի գոյափիլիսոփայությունն է. նույն արիապաշտ ոգին, դյուցազնաստիպ հերոսը, բացարձակ նվիրումը, նույն գաղա-փարաքաղաքական դավանանքը. «Ես եմ, ես եմ, ես եմ, իմ անունն է Պայքար՝ և վախճանս՝ Հաղթանակ»:

«Ինչ արժե հանճարը,— շարունակում է Նժդեհը,—...Երբ իր ցեղի ճակատագրի գերզգացողությունը չունի և չի սնու-ցաներ իր ցեղի հավիտենականության ձգտումը: Միևնույն չէ, կա թե չկա մմանը, երբ իր շրթունքներին ցեղի խոսքը չէ, և չգիտե վերադաստիարակել, արիացնել ու վարել զանգ-վածները. երբ անգոր է... զինվորագրել տալ մի մեծ ու արդար դատի, կարիքի դեպքում իր ժողովրդի ծոցեն շա-նանման հերոսներ քանել»: Սիամանթոն իր պոեզիայով հռչակում է սեփական ուժը չճանաչող ժողովրդի ցեղական կորովը, բարոյական անխոցելի ամրությունը՝ մաքառումի վստահությամբ հեղափոխելով անկախություն չունեցող կրավորական մահատակի հոգեբանությունը:

Եվ պաղատանքի, աղոթքի, լաց ու կոծի և ողբի այն մա-տյաններուն մեջ,
Ուր դար առ դար իմ սերունդներս իրենց արյունը և տա-ռապանքն են լացեր,
Մեկ կողմ նետեցի ես զանոնք, պարտութեն ստրկացում և աղաչանքն արցունք չերթալու համար...

Աղաչանքը արցունքի է հասցնում, իսկ պարտությունը դեռ ստրկացում չէ. սա Յարճանյանի պոեզիայի խոհափիլիսո-

փայության հիմնադրույթներից է: Կորուստներին և ող-բերգություններին դիմագրավելու ճանապարհը, ըստ բանաստեղծի, մաքառումն է, դիմադրողականությամբ գոյությունը պաշտպանելու համընդհանուր գիտակցու-թյունը, ընդվզումի անկախ հոգեբանությունը:

Տեսա, որ ձեր փրկությունն մուրացողի բոքիկ ոտքերն
ավերակներու մոխիրներեն այրեցան...

Տեսա, որ դուք արցունքի մեջ երջանիկ էիք և
կենսաբեր կոշիկին դեմ ահաբեկ...

Հզոր երևակայությամբ բանաստեղծելով պայքարի ահեղ ընթացքը՝ Սիամանթոն աստվածացնում է ազգի փառահեղ հերոսներին, որոնք, մահն արիամարիելով, գերմարդկային տառապանքների մեջ՝ կախաղաննե-րի վրա, աքսորավայրերի շղթաներում, հերոսամարտե-րում, օրհնում են իրենց գաղափարն ու գործը՝ ազգի պատմության և ճակատագրի վրա դրոշմելով իրենց փառահեղ կենսագրությունը. «Հին դյուցազները աշ-խարհակալներ էին կամ ասպետներ. նորերը, Յարճա-նյանի հերոսները, հեղափոխականներ են կամ առա-քյալներ»,— նկատում է Դ. Վարուժանը:

Սիամանթոն պոեզիա է բերում բարոյական ռազմի չգրված օրենքները: Թշնամին ոճրագործ է. արժանի չէ հայորդու բազկի հարվածին, բայց պետք է կռվի հայոր-դին, որ իր մեջ կրում է հնագույն ցեղի հոգևոր շաղախը, անկշռելի ցավն ու քրիստոնյա տառապանքը: Արևորդի-ների, դյուցազունների կամ քաջազունների սերունդն է մա՝ դյուցազնական կռվի օրենքներն արյամբ ժառան-գած, տիպարը բոլոր ժամանակների բարոյական ռազ-մի. «Գլուխս սուգերեն և վրեժեն և ճակատագրեն թեև ալեհեր, // Բայց, տես, աչքերս դյուցազնի մը աչքերուն չափ կարմիր, և կերպարանքս է սուկատեսիլ...»:

«Անդրանիկ» քերթվածքում հին ու նոր հերոսների՝ Արամ, Տիգրան, Արտաշես, Վարդան, Աղբյուր Սերոբ, Փարյան, Պե-տո, Ժիրայր, անձնուրացության և արիության ներշնչումով Սիամանթոն իմաստավորում է պայքարի կորովը. «Գիտ-ցիր, որ այս զոհաբերումի, ընդվզումի և հույսի օրերուն, // Մեր ամեն մեկուն համար անկողնի մեջ հոգի տալը վա-տությունն է վատություններուն»: «Որբերու ճակատագրեն», «Բանտերու խորերեն», «Կախաղաններու կատարեն» քերթ-վածքներում խոսքի վեհափառ տաճարումներով Յարճա-նյանը կրկին պանծացնում է նվիրական, սրտոտ, պայծառ հերոսների բարոյական զոհողությունների կամքն ու զորու-թյունը: Բանտերի զնդաններում, կախաղանների վրա մահ-վան գաղափարն ի սկզբանե հաղթահարած այդ հերոսները կործանվում են ինչպես աստվածներ՝ հայրենիքի փրկության ողբերգական վախճանով:

Անոնք, որ օր մը, փառքի օր մը, պատմության օր մը, օր
մը հերոսության,
Չարիքին օրենքները պատռեցին արդարության առավո-տի մը ի խնդիր,
Անոնք, որ իրենց անձը զոհել ուզեցին գաղափարին խո-րանին առջևը կանգուն,
Անոնք, որ թշնամիի սուրին դիմաց, մեր կյանքին համար,
իրենց սուրը շողացուցին,
Անոնք, որ ցեղին ստրկության շղթաները, ցեղին ուսեն՝
իրենց ուսերուն վրա վերցուցին...

Օրհներգությանը հաջորդում են հերոսների տարերային ուժի, անմահության խորհրդի պատկերային գյուտերը: Հե-րոսների հոգեվարքի համար է սահմանվել երկնականարի լույսը, նրանց բռնուցքներում կայծակներ կան ծրարված, աչ-քերում՝ աստղեր, հերոսները մահամերժ ներկայություն են:

Հսկաներ դուրս կ'աշտանակվին, անընկնելի և շքեղ և ան-վեհեր,
Իրենց ըմբոստի ուսերեն առկախ երկաթները ազատա-րար զանգերու պես մեկզմեկու ընդհարելեն...
Դեպի ստույգ մահը կը քալեն, ցեղին ցավովը սպառազեն և մոտավոր մահեն զորավոր...

Ժողովուրդը իր հերոսների գործի գիտակցությունը պի-տի ունենա, նրանց նվիրումը սրբագործելու առաքելությու-նը ստանձնի. հերոսներին գնահատելու և նրանց հանդեպ պատասխանատվության մեջ է ժողովրդի բարոյականը: Բանաստեղծի համոզմամբ՝ հերոսներին ուրանալն ազգա-յին բարոյականության անկումն է: «Երկար դարեր մեր պատ-մությունը չէր արձանագրել մի շրջան, ուր այնքան հերոս-ներ իրենց կյանքը երկյուղածորեն պատարագեին իրենց ժողովրդի փրկության գործին, բայց չի եղել և մի շրջան, ուր հայության որոշ խավերը այնքան ապերախտ զոհվելին սե-փական ժողովրդի ազատագրական փոթորկումների հե-ղեպ»,— գրում է Նժդեհը: Նժդեհից առաջ նույն ողբերգական տազնապով Սիամանթոն բանաստեղծում էր:

Բայց ո՛վ էր, որ պիտի ողբար քո բարոյականը, ո՛վ խավա-րի և ավերի ժողովուրդ,
Դուն, որ դահիճներուն առջև կը ծնրադրես և հերոսներուն համար պսակ հյուսել չես գիտեր...

Եվ ո՛վ պիտի բերե իդեալաշատության մրրկոտ ջահը, քո կյանքի ճանապարհին վրա, հերոսաբար սարսելու...
Եթե ոչ Հայորդին, որուն հստակ մտածումը, Արևմուտքին իդեալները ձեր դիմաց ապարդյունորեն ցուլացուց...

➔ էջ 6, 8

Գարեգին Նժդեհի խոհերը բանակի մասին

Ձինվորի համար կռվի ժամանակ դրոշակը, ազգը, հայրենի երկիրը և նրա սրբությունները խորհրդանշողը իր առաջնորդն է. ահա՛ թե ինչու կատարյալ առաջնորդը միշտ էլ իր զորքերի հետ է, նրանց կողքին և նրանցից առաջ: Նա ռազմավարական գետն է և ոչ զինվորական արհեստավոր: Վերջապես, նա ընկերն է իր զինվորի:

Ամեն մի առաջնորդ այնքան է պահանջում իր զինվորներից, որքանի ընդունակ է ինքը: Միայն այնքան անվեհերություն և անձնագոհություն, որքանի ընդունակ է ինքը, և ոչ ավելին: Եվ ուր վերջանում է լավ առաջնորդը, այնտեղ սկսում է վատ զինվորը:

Իսկական առաջնորդը շատ անգամ չի նշանակվում, նա երևան է գալիս, երբ նրա կարիքն է զգացվում, նա հայտնվում է վտանգի ժամանակ:

Կատարյալ առաջնորդը նախ հոգեբանորեն ստեղծում է իր բանակը՝ տալով նրան իր հոգին:

Չորքը եթե ոչ առաջին, ամենաուշը երկրորդ օրը բնագոյաբար ճանաչում է իր առաջնորդին: Նա շատ շուտ է տարբերում «մեծ»-ը «փքված»-ից: Նա հարգում է գիտակցական կարգապահությունը, բայց չի սիրում պաղ և անհոգի պաշտոնականությունը: Նա ուզում է, որ իր առաջնորդը լինի ավելի սրտի մարդ և, ամենագլխավորը, նաև զինվոր: Եվ այդպիսին է կատարյալ առաջնորդը. նրան պաշտում են, բայց չեն վախենում նրանից և չպիտի վախենան:

Կառավարելու մի հատիկ միջոց ունի նա՝ խոսքը, խիստ, բայց ընկերական, խոսքը՝ եր-

բեմն որպես սանձ և միշտ էլ որպես խթան: Նա կառավարում է անձամբ, արհամարհելով ճանապարհը մատով ցույց տվող ղեկավարին: Խիստ է, բայց ոչ կոպիտ: Հպարտ է, բայց ոչ փառասեր: Պարզ է, չարքաշ, անշահասեր:

Ուզանավարի համճարը բխում է իր հոգու վեհությունից:

Որոնք են լինելու վաղվա Հայաստանի սահմանները:

— Անոնք, որ պիտ գտնեն հայ զինվորի արիությունն ու հայրենասիրությունը:

Կռվադաշտում մամնիր առյուծին, որը բնում է բաց աչքերով:

Կռվում ճանաչիր մի հատիկ սահման՝ անկարելին:

Էապես ոչինչ է անում այն ժողովուրդը, որն իր նյութական զենքերի հետ միաժամանակ չի կատարելագործում նաև իր զինվորը:

Լավ բան է, անշուշտ, մի հատիկ զենք ավելի ունենալ, բայց ոչինչ բան է հազարներով իսկ ավելի ունենալը, եթե ռազմիկին վարողը մահվան գաղափարի հետ հաշտված հերոսական ոգին չէ:

Կենսաբանորեն անբարոյական է այն ժողովուրդը, որի մեջ զինվորը ներքին թշնամիներ ունի:

Ձենք կրել չի նշանակում ճշմարիտ զինվոր լինել: Ձենքը չէ մարդուս զինվոր դարձ-

նողը: Կա մի այլ բան — ոգին, մարտական խմորը, արիության խմորը, հայրենի հողի զգացումը, սրբության զգացումը, իր կյանքից ավելի իր դրոշակը սիրելու և նրա համար ամեն վայրկյան մեռնելու հոժարանքը:

Առաջինը եղիր հարձակման, վերջինը՝ նահանջի ժամանակ:

Բավական չէ իր Ազգի զավակը լինել, պետք է նաև նրա հրաշունչ զինվորը լինել:

Անկրոն էակը հրաշունչ զինվոր չի դառնա:

Ամեն հայ ընդունակ է մարտիրոսանալու, իսկ ամեն մարտիրոս կարող է հերոս լինել:

Վայ այն զինվորին ու զորքին, որն իր ղեկավարների աչքերի մեջ բոց, շարժումների մեջ՝ վճռականություն, սրի ծայրին շանթ չի տեսնում. դատապարտված է մահ:

Բարոյական ուժն է գոտեպնդում փոքր ժողովուրդներին ու բանակներին անհավասար կռվում. նա է ղեպի հաջողություն ու հաղթանակ առաջնորդում թվապես թույլերին՝ մեծ, մեծամեծ հակառակորդների դեմ:

Միայն արին, քաջը, միայն հերոսը կարող է զոհաբերել:



Ժողովուրդները չեն պարտվում, եթե չեն ուզում պարտվել:

Վաղը հաղթելու է մահ, որ մինչ այդ վաղը իր հոգու մեջ կտանի հաղթանակը:

Կռվի ժամանակ զինվորն ավելի շատ բարոյական մեծակությունից է վախենում, քան մահից:

Չորական, կռվի այնպես, որ կարողանա ասել զենքի ընկերների՝ ինձ պես կռվեցեք:

Արդարությունը

«Որովհետև մեր պարծանքը սա է՝ մեր խղճմտանքի վկայությունը...»:
(Բ Կորնթ. 1. 12)

«Արդարի արդարությունը իր վրա է ընկնելու, ամօրենի արդարությունը՝ իր վրա»:
(Եզեկ. 18. 20)

Արդարությունը (հունարեն՝ «δικαιοσύνη», ճշմարտություն, օրինականություն), ամեն բանից զատ, նախ հոգեվիճակ է, յուրաքանչյուր պարագայում և ամեն բանի նկատմամբ արժանին հատուցելու մղումն ու ճշմարտությանը ապրելը. «Բայց ասում են ձեզ, որ եթե ձեր արդարությունը ավելի չլինի, քան օրենսգետներից և փարիսեյներից, երկնքի արքայությունը չեք մտնի» (Մատթ. 5. 20, հմմտ. Սաղմ. 10. 7, 85. 2, Առակ. 12. 5), ուրիշ խոսքով՝ նեմ-գությունից, կեղծավորությունից, հիշաչարությունից, մարդահանությունից, փառասիրությունից, շահասիրությունից, կողմնակալությունից և այսօրինակ վարք ու բարքից հեռու մնալը (երբ մարդու արտաքին վարքագծի և ներքին հոգեվիճակի միջև ընդգծված անհամապատասխանություն կա), ինչպես ընթերցում ենք Աստվածաշնչում. «Նա, ով ազահ է շահի համար, աղետ կբերի իր ընտանիքի վրա, բայց նա, ով ասում է կաշառքը, կապրի» (Առակ. 15. 27), «Ազահը կռիվ է հրահրում, բայց նա, ով ապավինում է Տիրոջը, կհաջողի» (Առակ. 28. 25), «Չարը պարծենում է սեփական կրքերով, անիծում և նախատում է Տիրոջը»



Հոր Արդարը

(Սաղմ. 9. 24): Ինչպես նաև՝ «Վայ նրանց, ովքեր... նվերների համար արդարացնում են մեղավորներին և զրկում արդարին...» (Ես. 5. 22–23): Այսօրինակ հորդորների հանդիպում ենք Հին և Նոր Կտակարանների մի շարք գրքերում (Բ Պետ. 2. 15, հմմտ. Ա Տիմոթ. 6. 9–10, հմմտ. Սաղմ. 26. 9–10, Ելք 23. 8, Բ Օր. 10. 17). «Նա, ով քայլում է արդարությամբ և ասում է ճշմարտությունը. ով արհամարհում է կեղեքման շահը... նա կբնակվի բարձրության վրա...» (հմմտ. Ես. 33. 15–16): Իսկ Պողոս առաքյալը, ավելի հեռու գնալով և մեջբերելով մարգարեի խոսքերը, ասում է. «Չկա արդար և ոչ մեկը... Բոլորն էլ միասին խոտորվեցին և անպետք դարձան...» (Հռոմ. 3. 10–18):

Իրավափիլիսոփայության և սոցիոլոգիայի դիտակետից՝ արդարությունը կամ արդարացիությունը բազմաբովանդակ հասկացություն է, բայցև իրավիճակային լավագույն հետևանք ու ելք: Գիտական նշանակության առաջին

կարևորագույն տեսությունը հույն նշանավոր իմաստասեր Պլատոնի «Պետություն»-ն է: Աստվածաբանության տեսակետից՝ արդարությունը մարդու արտաքին և ներքին հոգեկան համերաշխ վիճակն է, երբ հոգու, մտքի և մարմնի բոլոր ուժերը կենտրոնացած են Աստծուն հաճելի կենցաղավարությամբ: Աստված միշտ գործում է «Բարու» շրջանակներում և նույնն էլ ակնկալում է բանականներից: Ենթե իր արդարության համար Աստծու կողմից կենդանի տարվեց երկինք (հմմտ. Ծմնդ. 5. 21–24, Եբր. 11. 5), «Արդա՛համը հավատաց Աստծուն, և դա նրան արդարություն համարվեց» (հմմտ. Հռոմ. 4. 18–25), կամ «Արդարությունը բարձրացնում է ազգը, բայց մեղքը ազգեր է նվազեցնում» (Առակ. 14. 34):

Հայտնի է, որ երբ Սամուել մարգարեն ծերացավ, իր որդիներին Իսրայելի վրա դատավորներ կարգեց: Նրա որդիները, սակայն, չգնացին իրենց հոր ճանապարհով, այլ «ընչաքաղցության հե-

տևից ընկնելով՝ կաշառք էին վերցնում և իրավունքը թյուրում» (Ա Թագ. 8. 1–3): Աստվածաշնչում անարդարության և դիցուք՝ «կոռուպցիայի ամենահայտնի օրինակներից մեկը» Ջաքեոսի պատմությունն է: «Ես իմ ունեցվածքի կեսը կտամ աղքատներին, և եթե որևէ մեկին որևէ կերպ անիրավություն են արել, նրան քառապատիկ կհատուցեմ», — հայտարարում է նա, երբ արժանանում է Հիսուսի ուշադրությանը, որին ի պատասխան Հիսուս հեշակում է. «Այսօր փրկությունը եկավ այս տանը... որովհետև մարդու Որդին եկավ փնտրելու և փրկելու կորածը» (հմմտ. Ղուկ. 19. 1–10):

Դարձյալ այս մասին են Աստվածաշնչում տեղ գտած «Ամիրալ տնտեսի առակը» (Ղուկ. 16. 25), Հուդայի մատնության մասին պատմությունը (Մատթ. 26. 14–16), «Փարիսեցու և մաքսավորի» առակը (Ղուկ. 18. 9–14), «Սիմոն մոգի մասին պատմությունը» (Գործք 8. 18–20): Ուստի ամեն անգամ, երբ հպարտությամբ տոգորված մարդն իրեն աստվածային իշխանություն է վերապահում, իսկ Աստծու օրենքի փոխարեն անձնական կամայականություն, առաջ է գալիս անարդարություն և «բարոյական կոռուպցիա»:

Արդարության ստույգ ըմբռնման բացակայության պատճառով ոմանք չեն կարողանում հասկանալ, թե գործնականում ինչպես վարվել (Հռոմ. 2. 15, 16), մյուսները մարդկային անկյալ, անկատար վիճակում, գերի լինելով կրքերին, խախտում ու խաթարում են արդարության մասին պատկերացում-

ները (Ես. 5. 20, Սիր. 9. 4, Հոբ 14. 4): Այսպես՝ «արդարության» ազնիվ գաղափարը փոխարինվում է, օրինակ, «հավասարության» մասին սին ու անառողջ ուսմունքով: Նրանք, ովքեր կարծում են, թե բացարձակ հավասարության մասին ուսմունքն արդարադատ է, եթե չեն տառապում տգիտությամբ, ըստ էության, թաքցնում են իրենց վարքի իրական դրդապատճառները, նույնպես և նրանք, ովքեր պահանջում են, որ ոչ ոք չպետք է ունենա ավելին, քան մյուսները: Այսպիսիներին Աստվածաշունչը հստակորեն պատգամում է. «Եթե ձեր սրտերում դառն նախանձ և եսասիրական փառասիրություն ունեք, մի պարծենաք և մի ստեք ճշմարտության դեմ» (Հակ. 3. 14): Նույն կերպ, օրինակ, երբ դատավոր կամ ղեկավար կամ իշխանություն ունեցող մեկը ոմանց խստորեն դատապարտում է, իսկ ուրիշների, ինչ-ինչ համագամքներով պայմանավորված, մեղմ է մոտենում, երբ ոմանց առանձնացնելով բարեհաճ վերաբերմունքի է արժանացնում, իսկ ոմանց նկատմամբ անբարյացակամ է, կողմնակալ, անարդարադատ: Իսկ եթե բոլոր դեպքերում և բոլորի նկատմամբ էլ իրեն դրսևորում է «անաչառ կերպով», ապա բացահայտ կեղծավոր է:

Անարդարությունը իշխանության օժտված որևէ մեկի կողմից անհատի կամ խմբի նկատմամբ ցուցաբերվող աջակցությունն է, որը, որպես կանոն, հիմնված է անձնական շահի կամ սուբյեկտիվ դատողության վրա, բայց ոչ երբեք օբյեկտիվ կամ պատճառաբանված չափորոշիչների: ➡ էջ 7

Աստուծոյ Օրէնքներուն եւ պատուիրաններուն մասին

Սկիզբը՝ 2023 թ. դեկտեմբեր Բ, 2024 թ. հունվար Ա համարներում

Տասներորդ հարցում. *Մովսիսական օրէնքի իմներորդ հրամանի մասին:*

Իմներորդ հրամանը այս է. ընկերոջը կնոջ մի ցանկար:

Աստուծոյ օրէնքն ու մարդկային օրէնքը իրարմէ տարբեր են, որովհետեւ Աստուծոյ օրէնքը կ'արգիլէ նաեւ սիրտին չարութիւն խորհիլը. իսկ մարդկային օրէնքը կ'արգիլէ ձեռքին: Քանի որ մարդը երևելի է, [ապա] յայտնի, երևցած գործերը կը դատէ, սակայն Աստուած աներևոյթ է, որով հոգիին խոր-հուրդն ալ կը դատէ, ինչպէս այս պատուիրանին մէջ յայտնի կը դառնայ:

Մարդկային օրէնքները մինչև չարութիւնը կատարուած չտեսնեն, չեն կրնար սիրտն ու խորհուրդը դատել, սակայն Աստուծոյ առջև մարդուն կամքը, կամեցողութիւնը կատարեալ, կատարուած գործ կը համարուի: Ինչպէս ըսաւ Քրիստոս, թէ ով որ ցանկութեամբ կը մայի կնոջ մը, արդէն իսկ իր սիրտին մէջ շնացած կ'ըլլայ անոր հետ, այդ պատճառով հրամայեց. ընկերոջը կնոջ մի ցանկար: Որովհետեւ Աստուած ցանկութեան որպէս դեղ եւ անոր պատճառած որդեծնութեան հրաման տուաւ ամուսնանալ, բայց աւելորդ ցանկութիւնը օտարներուն արգիլեց, որպէսզի մարդ իր կինն ու օտարը ծանցնայ, որպէսզի ամաստուններէն տարբերի: Քանի որ ինչպէս արդար վաստակը հրամայեց եւ գողութիւն ընել արգիլեց, այսպէս ալ մաքուր, անարատ ամուսնութիւն հրամայեց եւ ուրիշներու կիններուն ցանկալը արգիլեց: Որովհետեւ ինչպէս որ մարդ չուզէր, որ ուրիշ մարդ մը իր կնոջ ցանկալ ու աչք մետէ անոր վրայ, այդպէս ալ ինք պէտք է աչք մետ տուր ուրիշներու կիններուն, որ չար ազահութիւն է:

Դարձեալ ինչպէս ծառը արմատէն կը բողբոջի ու կը ծիլ, այդպէս ալ շնութիւնն ու կատարուած գործը սիրտի ցանկութենէն կը զօրանան եւ կը կատարուին. իսկ ցանկութիւնը այլևս հնարաւոր չըլլար արգիլել: Արդարեւ, մարդ պէտք է զգայ իր աչքը, որպէսզի պատուհանէն, դռնէն գողը [ցանկութիւնը] տուն չմտցնէ, քանի որ մարդուն աչքը հոգիին ու սիրտին դուռն է, եւ այս դռնէն մահը հոգիին մէջ կը մտնէ:

Այս ցանկութիւնը երեք բանէ կը յառաջանայ:

Նախ՝ սատանային քէֆ տալէն, պատճառելէն:

Երկրորդ՝ մարմինի հեշտութենէն: Երրորդ՝ միտքի եւ կամքի հաւանութենէն: Առաջինին համար առաքեալը կ'ըսէ, թէ հակառակեցէք սատանային, եւ ան կը փախչի ձեզմէ:

Երկրորդին համար կ'ըսէ, եթէ մարմինի հաճոյքներով ապրիք, հոգիով պիտի մեռնիք:

Երրորդին համար կ'ըսէ. մարմնականը խորհիլը մահ է: Որովհետեւ ցանկութիւնը յղանալով՝ մեղքը կը ծնի, իսկ մեղքը, երբ իր կատարումին հասնի, մահ կը ծնի:

Արդ, թէեւ ցանկութիւնը յատկապէս սիրտին համար կ'ըսուի եւ սիրտէն է, սակայն աչքերու ցանկութիւնն ալ կայ, ինչպէս արգիլուած են գեղեցիկները [պոռնիկները, անբարոյները]:

Ականջներու ցանկութիւն կայ, ինչպէս գարշելի խաղերն ու բոլոր տնաւեր խօսքերը:

Բերանի ցանկութիւն կայ, ինչպէս անուշահամ կերակուրները եւ տափական գարշելի խօսքերը:

Յոտոտելիքի ցանկութիւն կայ, ինչպէս իզացուցիչ խղերը:

Իսկ հիմա՝ հիւանդութիւններու մասին ըսելէ ետք, դեղերու մասին ըսեմք:

Նախ՝ օտար կնոջ տեսութենէն պէտք է փախչիլ, ինչպէս Ղովտը Սողոմէն փախաւ:

Երկրորդ՝ թոյլ չի տալ որ չար խորհուրդները սիրտէն մերս մտնեն, քանի որ ծուռ խորհուրդները մարդս Աստուծէ կը բաժնեն:

Երրորդ՝ աղօթքի ժամանակ յատկացնել, քանի որ Աստուած է, որ մարդս կը պահէ մեղքերէն. ինչպէս նաեւ իմաստութիւնը եւ մաքուր խղճմտանքը:

Չորրորդ՝ պահեցով եւ ծոմով, որովհետեւ ցանկութիւնը չի կրնար մտնել այն մարդուն սիրտը, որ պարսպուած կ'ըլլայ աղօթքով, պահեցով եւ ծոմով:

Հինգերորդ՝ զբաղիլ կարդալով եւ այլ բարի զբաղումներով, որպէսզի սատանան պարապ ժամանակ չգտնէ մարդուն մէջ՝ զայն փորձելու համար:


Ցանկութիւնը սերաստես օձ է [կերաստես, եթովպական եղջիրաւոր օձ], որ մայելով կը սպաննէ.

ով որ կ'ուզէ ազատիլ, անմիջապէս աչքերը ետ թող դարձնէ [չնայի]:

Տասնմեկերորդ հարցում. *Մովսիսական օրէնքի տասներորդ հրամանի մասին:*

Տասներորդ հրամանը այս է. ընկերոջը տան մի ցանկար, ինչպէս նաեւ անոր այգիին, ծառային, աղանձին, եգին, էշին, նաեւ անոր բոլոր անասուններուն մի ցանկար, եւ ո՛չ ալ այն բոլոր բաներուն, որ քու ընկերոջն են:

Մարդուն կենդանի եւ բանական տունը իր կինն է. անկենդան տունը՝ իր բնակարանը: Արդարեւ, քանի որ մախ կենդանի տան



Ռեմբրանդտ. Մովսեսը տառը պատվիրաններով, 1659 թ.

եւ կնոջ համար ըսաւ չցանկալ, հիմա՝ հրամանի վերջաւորութեան, անկենդան եւ բնական տունին համար կ'ըսէ: Որովհետեւ իմաստունները կ'ըսեն, թէ մարդուն սիրտն ու աչքը անկուշտ են. մարդուն սիրտը միայն Աստուած կրնայ լեցնել, իսկ մարդուն աչքը՝ ափ մը հողը:

Արդարեւ, մարդ պէտք է օտարի դրամին ու ունեցեալներին չցանկալ. թէ կայուն՝ որ տունն է, թէ՛ զնայուն, որ ծառան է, աղախինն է, եգն ու էշն են:

Որովհետեւ Ս. Պօղոս կ'ըսէ, թէ անոնք, որոնք մեծնալ կը ցնական, փորձութեան կը հասնին եւ սատանայի որոգայթներուն կը մատնուին: Քանի որ երբ մարդ շատ բաներու տէր ըլլայ, իր ազատութիւնը կը կորսնցնէ եւ իր ինչքերուն գերի կ'ըլլայ եւ կը մատնուի հոգեբան ու կասկածներու: Այն հարուստ մարդուն նման, որ կ'ըսէր՝ շտեմարաններս պիտի քակեմ եւ անոնց փոխարէն աւելի մեծերը պիտի շինեմ. անոր ըսուեցաւ, թէ՛ անմիտ, այս գիշեր իսկ հոգիդ քեզմէ պիտի պահանջեն, այդքան հաւաքածդ որո՞ւ պիտի ձգես:

Եսայի մարգարէն այսպիսի ցանկացողներուն վայ կու տայ, ըսելով. վայ անոնք, որոնք տունին տուն կը կցեն, որպէսզի ընկերոջ ունեցածն ալ յափշտակեն [տէս Ես. 5:8]: Այսպէս ըրին Աքաբան ու Յեզաբելը, որոնք Նաբովի այգին յափշտակեցին [տէս Գ. Թագ. 21:1–16]. տես, թէ ինչպէս պատժուեցան,

երկուքին արիւնն ալ շուները լիզեցին [տէս Գ. Թագ. 22:38]: Իսկ Եսդկսիա թագուհին, որ այրի կնոջ այգին քաշեց անոր ձեռքէն, ամբողջ երեսուն տարիներ անոր գերեզմանը երերաց. հետևաբար, տես, թէ ցանկութիւնը ինչ գէշ բան է:

Օտար դրամի մի ցանկար եւ անշէջ հուրով մի այրիր.

օտար դրամով չես յագեցնար, այլ՝ չար ցանկութեամբ կը մաշիս:

Տասներկրորդ հարցում. *Աստուծոյ եւ ընկերոջ սիրոյն մասին, որ օրէնքներու լրումն է. եւ Քրիստոսէ՝ հիններով մոր նորոգում:*

Օրէնքներու եւ պատուիրաններու պակք, թագն ու գերագանց լրումը զԱստուած սիրելն է: Ըստ առաքեալին, թէ օրէնքներու լրումը սէրն է. սուրբ սիրտն է բարի միտքն ու անկեղծաւոր հաւատքով սիրել զԱստուած՝ իրեն համար. իսկ ընկերը սիրել՝ Աստուծոյ համար, եւ առ Աստուած եւ Աստուծմով, այս երկու պատուիրաններէն կախեալ են ամբողջ օրէնքն ու մարգարէները: Որովհետեւ տասը պատուիրաններէն երեքը գրուած էին մէկ տախտակի վրայ, Աստուծոյ կը վերաբերէին, որոնք հետեւեալներն էին.

ա. Կուռքեր չշինել:

բ. Չոր տեղ Աստուծոյ անունը չգործածել:

գ. Շաբաթ օրը սուրբ պահել:

Իսկ մնացեալ եօթը պատուիրանները, որ երկրորդ տախտակին վրայ գրուած էին, ընկերը սիրելուն կը վերաբերէին:

Տակաւին, Սուրբ Պօղոս առաքեալը բոլոր պատուիրանները կը վերաբերէ զԱստուած սիրելուն, ըսելով թէ՛ բոլոր պատուիրանները մէկ բանով կը կատարուին՝ զԱստուած սիրելով, քանի որ ընկերը Աստուծոյ համար պէտք է սիրենք:

Արդ, պարտաւոր ենք զԱստուած սիրել ամբողջ սիրտով, այսինքն՝ իմացականութեամբ՝ առանց սխալելու հաւատալիքներու մէջ: Ամբողջ անձով, այսինքն՝ կամքով՝ առանց ներհակութեան: Եւ ամբողջ միտքով, այսինքն՝ յիշողականութեամբ ու առանց մոռացումի, որովհետեւ յաճախ Աստուծոյ բարերարութիւններուն յիշումը մեզ զԱստուած սիրելուն կը տանի: Իսկ Աստուծոյ նախկին բարերարութիւնը՝ յախտեաններէն մեզ ստեղծել նախասինմանէն էր:

Երկրորդ՝ ժամանակի ընթացքին ստեղծելը:

Երրորդ՝ ըստ Հոգիին մեզ իր պատկերով ստեղծելը:

Չորրորդ՝ սկզբնական արդարութեամբ եւ շնորհքով զարդարելը:

→ էջ 8

Հայորդու բարոյատիպը Աստուծոյ Յարճանյանի ռազմերգութեան մէջ

← էջ 4

Իր ժողովրդին արժանի հերոսների և իր հերոսներին արժանի լինելու ժողովրդի բարոյականն է հռչակում Սիամանթոն՝ գաղափարի արժեկշռով արծարծելով հերոսականը, արիականը համընդհանրացնելու, ժողովրդի հոգեբանությունը վերանորոգելու, ազգային անկումի տիրական հոգեվիճակը բեկելու մտայնությունները.

Ո՛ր եմ ուրեմն, ո՛ր եմ մեր բազուկները, մեր կամքերը, մեր մուրճերը, մեր հարվածներն ազատաբեր, Ո՛ր եմ մեր սերը, ո՛ր եմ մեր խիղճը, մեր վազքը, մեր զայրույթը շանթածորար, Եվ է՛րբ, է՛րբ պիտի վար շրջենք, է՛րբ պիտի խորտակենք, է՛րբ պիտի փշրենք Մահվան դուռներն այդ բանտերուն, երթալ հափշտակելու, երթալ համբուրելու համար, Այդ հափիտենական հերոսները, որոնք մեր կյանքը իրենց կյանքն անհունապես ավելի սիրեցին...

Մերկացնելով մեծ տերությունների աշխարհաքաղաքականությունը՝ Սիամանթոն կոչ է անում ժողովրդին՝ հայացքն ուղղել դեպի իր ներսը՝ սեփական փրկությունը սեփական ուժի մեջ որոնելու պատմական ճշմարտության իմաստնությամբ.

Իրենց բարի ժպիտը կեղծ էր, իրենց խոստումը՝ մահաբույր, և նայվածքնին՝ ծածկամիտ, Իրենց բուրվառիճն մեջ մեր արյունն էր, որ խունկի փոխան կը ծխար... Իրենց սկիհը մեր արցունքովը լեցված էր, և այն հացը զոր ձեր առջև նետեցին,

Մեր թշվառության և մեր տառապանքին վարձատրության արժեքն էր անգուր...

«Հայրենիքին կողմ մոր հերոսներու երկունքն կը սարսռա», — հիացմունքի երկյուղածությամբ իր պատկառանքն է բանաստեղծուն Սիամանթոն՝ երիցս օրինաբանելով պայքարի հերոսներին՝ «Կեցցեն Ըմբոսները, և կեցցեն Հայաստան», և երիցս ատելությամբ խարամելով դավաճաններին՝ «Մեռելներ կան, որ պէտք է անգամ մը ևս մեռցնել»: Մաքառումի գիտակցությանը զուգակշիռ՝ բարձրանում է նպատակի հաղթանակի վստահությունը՝ որպէս պայքարի առաջնորդ հոգեբանական ներուժ: Ապագայի անխառն ոգեշնչվածությամբ բանաստեղծը ձոներգում է. «Մեր ճշմարիտ սուրը և մեր Դրոշը պիտի ապրին, որովհետեւ կամքերնս կարմիր է, և վրեժնս»՝ անպարտելի: // Մեր սուրը պիտի ապրի, կյանքն ստեղծելու ու գաղափարին գահ մը կառուցանելու համար»՝ իր պատկառանքն արտածելով մաքառող հերոսների հանդեպ. «Նախանձությամբ ու տարփանքով հողին վրա ծնրադիր՝ // Իրենց հերոսի քայլերուն հետքը երկուդաճորեն համբուրեցի...»:

Բարոյական ռազմի կարկառուն քերթվածք է «Կովկաս» բանաստեղծությունը՝ «Նվեր կովկասահայ ընկերներուն» ընծայականով: Կործանվող հայրենիքը, կոտորածների մղձավանջը, սրածվող սերունդների արյան աղաղակը հատուցում են պահանջում, ազգային կեցվածքի հեղափոխում, անարգվող ցեղի վրեժխնդրության ցասում: Միմիայն հայորդու կամքը և ուժը կարող են վերածնել հոգեվարքի հասցված հայրենիքը: Կոտորածների համապատկերին ձուլվում է վրիժավառ ոգիների հերոսացումների ասպետական ուղին.

Չմրկ, Կովկաս, ավերակալ ու արցունքոտ Հայաստանին

աչքերը քեզի կը նային, Չմրկ, թեև գիտեմ, որ քու սուրիդ վեհությունը պէտք չէր արատավորել Այդ անբաններու խուժանին թունավոր ու պժգալից արյունեն...

Չմրկ, թեև գիտեմ, որ հերոսները հերոսներու միայն կրնան ընդհարվի...

Ցեղի զորության հայտնություն է Սիամանթոնի պոեզիան, ցեղի գաղափարական անկումն ու ֆիզիկական չգոյությունը կանխող հզոր ուժ՝ խոսքային արվեստի փառահեղ կերտվածքներով: Դյուցազնորեն դիմագրավելու, դյուցազնորեն մեռնելու և հաղթելու գաղափարը գերակա է թե՛ առաջին, թե՛ երկրորդ գրքում. նաև այդտեղից բանաստեղծական շարքերի խորագրերը՝ «Դյուցազնորեն», «Հայորդիներ».

Ինչ ոսկեղեն դարագլուխ է այս, և շղթաներու ինչ զայրազին փշրտում.

Ինչ ընդհարում ճակատ ճակատի, և հավատքի ինչ հաղթանակ.

Ինչ երկաթակուռ հարված բռնապետության անխախտելի օրենքներուն...

Հերոսամարտերում անմահացող սերունդը՝ «Եվ հաւաքատ և անպարտելի և անվեհեր զանգվածը մեր հիմնավորը Ազգին», բարձրացրեց ցեղի արժանապատվությունը՝ իր փառակերտ ճակատը Արևմուտքի դիվանագիտության դեմ վառելով որպէս ջահ, և անարդարությունն անգամ նրա ասպետական վարքի առջև «ամոթահար պարտվեցավ», — գրում է բանաստեղծը. → էջ 8

Արդարությունը

← էջ 5

Իր ամենատարբեր դրսևորումներով այն ներկայացնում է շահերի բախման բնութագրական իրավիճակ, քանի որ կապված է մեկ անձի կողմից մյուս(ներ)ի նկատմամբ հանդես բերվող կամընտրական բարեհաճության հետ, որտեղ մեկ անձի մասնավոր շարժառիթները գերիշխում են իր գործառնություններն իրականացնելու ընթացքում անկողմնակալ լինելու պարտականություններին: Այնինչ Աստվածաշունչը հստակ թելադրություն ունի. «Սիրիք քո Տեր Աստծուն... Սա է առաջին պատվիրանը: Իսկ երկրորդը սրան նման է. «Սիրիք քո ընկերոջը քո անձի պես»: Սրանցից ավելի մեծ պատվիրան չկա» (Մարկ. 12.30–31):

Լայն իմաստով՝ արդարությունն Աստծո վարձատրությունն է մարդկանց երկրային կյանքում կատարած իրենց գործերի դիմաց (Հոբ. 1.1), բացարձակ իմաստով՝ աստվածային այն հատկությունը, որով մարդու նկատմամբ եղած Նրա վերջնական գնահատականն ամրագրվում է հավերժության մեջ (հմմտ. Սաղմ. 110.3, 119.137): Մարդկային սահմանափակ ըմբռնումով՝ անարդարացի կարող են համարվել ամենաստույգ, ամենապարզ ու ամենակատարյալ ճշմարտությունները, և արդարացի կամ արդարացված՝ անգամ արատներն ու ցածրագի, գանգաճան այլ հանցագործությունները (հմմտ. Գ. Թագ. 3.16–28, Առակ. 24.23): Այսպես՝ մարդիկ, քանի որ ճշմարտությունն իբրև ողորմություն չեն նկատում, այլ մեծ մասամբ դատում են ըստ արտաքին օրենքների ու գործողությունների, զուրկ են մնում կատարելությունից և հաճախ հիմնվում են սոսկ մարդկային նպատակադրումների վրա (հմմտ. Գ. Թագ. 3.16–28, Սաղմ. 4.6, 30.24, Եփես. 4.25), որի համար Սուրբ Գիրքն ասում է. «Ամբարիշտների բռնությունը հասնելու է նրանց վրա, քանի որ իրաժարվեցին արդարադատություն անել» (Առակ. 21.7): «Դու մարդկանց չես խաբել, այլ Աստծուն»,— Ամանիային հանդիմանում է Պողոս առաքյալը (հմմտ. Գործք. 5.4–5, 10): Բայց Աստծու պարագայում այդպես չէ (հմմտ. Սաղմ. 119.138, 142, Հովհ. 3. 16): Ի տարբերություն մարդկանց՝ Աստված միշտ սրատես է, գաղտնատես. «.... Որովհետև մարդը նայում է արտաքին տեսքին, իսկ Տերը նայում է սրտին» (Թագ. 16.7): Աստծու արդարությունն անհամեմատ ավելի ողորմած ու գթառատ է (Սաղմ. 10.7, 110.3, 119.137, Առակ. 21.3):

Իզուր չէ, որ խոսելով Աստծու էության կամ բնության մասին՝ սաղմոսերգուն «արդար» բառի փոխարեն գործածում է «դատավոր» բառը (հմմտ. Սաղմ. 74.8), իսկ մեկ այլ տեղում՝ «Քո աջը լի է արդարությամբ» (Սաղմ. 47.11): Հարկ է նշել, որ Պողոս առաքյալը «դատավոր» բառի համար հիմք է նկատում ոչ թե «դատելը», այլ «դատողությունը» հավելելով. «Տերը հատուցում է յուրաքանչյուրին. և՛ նրանց, ովքեր համառորեն բարիք են փնտրում, և՛ նրանց, ովքեր անձնատուր են լինում անիրավության ու բարկության (Հռոմ. 2.6–8, հմմտ. Բ Տիմոթ. 4.6–8): Իսկ մեկ այլ դեպքում՝ «Ինչ որ աչքը չտեսավ, ու ականջը չլսեց, և մարդու սիրտը չընկավ, այն Աստված պատրաստեց իրեն սիրողների համար» (Ա Կորնթ. 2.9):

Ս. Մատթեոս ավետարանիչը «Լեռան քարոզը» ներկայացնելիս (Մատթ. 5.3–12), նկատի ունենալով Տիրոջ ճշմարտության կատարելությունը (հմմտ. Սաղմ.

50.6, 117.19, 119.138), Նրա արդարության հավիտենականությունը (հմմտ. Սաղմ. 119.142), և որ ամեն բան ծառայում է Աստծու փառքին (հմմտ. Սաղմ. 118.91), ևս դիմում կամ հղում է անուն մարգարեություններին (հմմտ. Սաղմ. 38.1–22), քանի որ արդարությունն փնտրողի համար (Սաղմ. 131.9) դրանք միանգամայն ուսանելի (Հոբ. 14.4) և առաջնորդող են (Սաղմ. 7.18, 118.7), ինչպես որ Ինքը՝ Տերն է ուսուցանում. «Սովորեցե՛ք ինձնից, որովհետև ես հեզ եմ և սրտով խոնարհ» (Մատթ. 11.29):

Բացի վերոհիշյալից՝ հարկ է գիտենալ, որ Արարիչը մարդուն օժտել է ազատ կամքով՝ ընտրելու բարին ու չարը, և միայն նրա ինքնորոշումից հետո է, որ բացահայտում է Իր արդարությունը, ինչպես որ տեսնում ենք «Սերմնացանի առակում» և հետևող մեկնաբանության մեջ. «Ահա սերմնացանը ելավ սերմանելու: Երբ նա սերմանում էր, մի քանի սերմնահատիկ ճանապարհի եզերքին ընկան, և երկմբի թռչունները եկան ու դրանք կերան: Իսկ ուրիշները քարքարոտ տեղ ընկան, որտեղ շատ հող չկար, և իսկույն բուսնեցին հողի սակավության պատճառով: Բայց երբ արևը ծագեց, վառվեցին և որովհետև արմատ չունեին, չորացան: Ուրիշները փշերի մեջ ընկան, և փշերը բարձրացան ու դրանց խեղդեցին: Իսկ ուրիշներն էլ բարեբեր հողի վրա ընկան ու պտուղ տվեցին. մեկը՝ հարյուրապատիկ, մեկը՝ վաթսուհապատիկ, և մեկը՝ երեսնապատիկ: Ով լսելու ականջ ունի, թող լսի... Ամեն ոք, ով լսում է արքայության խոսքը, բայց չի հասկանում, գալիս է չարը և հափշտակում նրա սրտի մեջ սերմանվածը. ճանապարհի եզերքին սերմանվածը սա է: Քարքարոտ վայրում սերմանվածը նա է, ով խոսքը լսելիս իսկույն ուրախությամբ ընդունում է այն, բայց քանի որ իր մեջ արմատ չունի, այլ ժամանակավոր է, ապա երբ այդ խոսքի պատճառով նեղություն կամ հալածանք է լինում, իսկույն գայթակղվում է: Փշերի մեջ սերմանվածը նա է, ով լսում է խոսքը, բայց այս աշխարհի հոգսերն ու հարստության պատրանքները խեղդում են այդ խոսքը, և այն անպտուղ է լինում: Իսկ բարեբեր հողի մեջ սերմանվածը նա է, ով լսում է խոսքը և հասկանում ու պտուղ է տալիս... Հիսուսը նրանց մեկ այլ առակ էլ պատմեց ու ասաց. «Երկմբի արքայությունը նման է մի մարդու, որն իր արտում լավ սերմ ցանեց: Երբ մարդիկ քնած էին, նրա թշնամին եկավ և ցորենի մեջ որոն ցանեց ու գնաց: Երբ խոտը բուսնեց ու պտուղ տվեց, երևաց նաև որոնը: Տանտիրոջ ծառաները մոտեցան նրան և ասացին. «Տեր, չէ՞ որ արտիդ մեջ լավ սերմ ցանեցիր: Ուրեմն այդ որոնը որտեղի՞ց է»: Իսկ նա ասաց նրանց. «Թշնամի մարդն է դա արել»: Ծառաները նրան ասացին. «Հիմա ուզում ես՝ գնանք, դրանք քաղանք»: Նա ասաց. «Ո՛չ, որոնք քաղելիս միգուցե ցորենն էլ դրանց հետ արմատախիլ անեք: Թողե՛ք, որ մինչև հունձը երկուսը միասին աճեն, և հունձի ժամանակ հնձողներին կասեմ. «Նախ որոնք քաղեք ու խրճեր կապեք այրելու համար, իսկ ցորենը հավաքեք իմ շտեմարանի մեջ»» (Մատթ. 13.4–9, 19–30):

Ինչպես նաև մարդու մեջ կա «բնական դատարան», որով նա տարբերում է բարին ու չարը (ոմանք այն խիղճ են բնորոշում, ոմանք՝ Աստծու ծայրը կամ պատկերը, ոմանք՝ այլ կերպ): Օրինակ՝

երբ «մարդու դատարանում» քննվում են արատներն ու առաքինությունները, ցանկությունները հաճախ հակվում են դեպի մեղքը, բայց Աստծու նկատմամբ երկյուղը հիշեցնում ու նպատակաուղղում է դեպի առաքինությունները: Ուրիշ խոսքով՝ արդարություն է նաև մարդու կողմից իր մեղքի ճանաչումն ու այլոց անմեղության գիտակցումը, որի վկայությունը դարձյալ տեսնում ենք Ավետարանում. «Եվ կախված այն չարագործներից մեկը նրան հայիոյում էր ու ասում. «Դու չէ՛ս Քրիստոսը. փրկի՛ր ինձը քեզ և մեզ»: Իսկ մյուսը պատասխանեց՝ նրան հանդիմանելով, ու ասաց. «Աստծուց չէ՛ս վախենում, դու, որ մույն պատիժն ես կրում: Մեզ համար արդարացի է, քանզի արժանի հատուցումն ենք ստանում մեր կատարած գործերի համար, իսկ սա ոչ մի վատ բան չի արել»: Եվ Հիսուսին ասաց. «Տեր, հիշի՛ր ինձ, երբ քո թագավորությամբ գաս»: Եվ Հիսուսը նրան ասաց. «Ծշմարիտ եմ ասում քեզ. դու այսօր ինձ հետ դրախտում կլինես»: (Դուկ. 23.39–41):

Հետևապես, երբ «բողոքն» անարդար է, դառնում է զրպարտություն, ինչպես մեկնաբանում է Ս. Գրիգոր Աստվածաբանը, իսկ մարդը մխիթարություն է ապրում արդարության որևէ դրսևորումից (հմմտ. Մարկ. 3.5), անկախ նրանից, թե այն իր հետ ինչ առնչություն ունի, որովհետև արդարության ամեն մի երևան գալու մեջ Տիրոջ իմաստությունը, մաքրագործումն ու փրկագնումը կան (հմմտ. Ա Կորնթ. 1.30), նաև՝ հավատարմությունն և հույս (Սաղմ. 118.121), իսկ «օրենքի լրումը սերն է» (Եփես. 4.26), ոչ թե վրեժխնդրությունը կամ բարկությունը (հմմտ. Սաղ. 4.4): Եվ ուրեմն՝ որևէ կացութաձևի հաստատում լինելու գրավականը արդարությունն ու հավատարմությունն են, քանի որ այսկերպ մարդը մոտենում և նմանվում է Աստծուն (հմմտ. Ելք 34.6, Բ Ծր. 7. 9): Ըստ այսմ՝ «Աշխարհի որևէ վայրում տեղի ունեցող անարդարությունը սպառնալիք է համընդհանուր արդարությանը» (Ս. Լ. Քինգ):

Առաջին քրիստոնյաները ևս հայտնի էին իբրև բարին նախընտրողներ (հմմտ. Ա Կորնթ. 10. 27) կամ «բարոյական» սրբեր (հմմտ. Բ Կորնթ. 6.15): Հայտնի է, որ արդարությունն ու հավատարմությունն առաջին անգամ բացահայտվում են հենց Արարչի առնչությամբ, հետայնու Տիրոջ հանդեպ առկա անվերապահ վստահության, ինչպես նաև «Օրենսդիր» նկատմամբ ու կամավոր ստանձնած բարոյական պարտավորությունների առիթով (հմմտ. Սաղմ. 30.6), սակայն առկա օրինակները բազում են (հմմտ. եբր. 2. 17): Ըստ այսմ՝ արդարությունն ու ճշմարտությունն ամբողջությամբ ճանաչելը միայն Աստծուն է հատուկ, իսկ ով դիմացինի մասին զրպարտությամբ է խոսում, ինքն էլ գերծ չի մնալու դատապարտությունից, որովհետև իրեն բարձր տեսնելով և այլոց վերից նայելով չի հասցնում նկատել սեփական թերացումներն ու զանցումները: Եվ ակնհայտորեն ենթարկվելով կրքերին ու ցանկություններին, չկարողանալով խոհեն կառավարել՝ կամա-ակամա ապականում է Աստծու կողմից իբրև պարզև տրված կյանքը: Դրա համար էլ Սուրբ Գիրքն ասում է. «Ամեն մարդ թող աշխույժ և ուշադիր լինի լսելու մեջ և դանդաղ՝ խոսելու և բարկության մեջ, որովհետև մարդու բարկությունն Աստծու արդարությունը չի անում» (հմմտ.



Գյուստավ Դորե. Սողոմոնի դատը, 1865 թ.

Հակ. 1. 19–20), ինչպես նաև՝ «Ամեն դառնություն, բարկություն, աղաղակ ու հայիոյանք թող վերանան ձեզանից...» (հմմտ. Եփես. 4.31):

Հատկանշելի է, որ Հին Կտակարանի մտածողության մեջ մի շարք արատներ, այդ թվում՝ անարդարությունը, նախևառաջ անհատական զգացումներ է և առանձին մարդկանց վարքագծի արտահայտություն: Այստեղ անգամ իբրև հանցագործություն ընկալվող վարքագիծը, եթե առանձնահատկություն ունի կամ «համապատասխանում է Աստծու կամքին», հստակորեն տարբերակվում է և կարող է անգամ արդարացվել: Սակայն Նոր Կտակարանում պատկերը միանգամայն որոշակի է. «Ոչ ոք չի կարող երկու տիրոջ ծառայել... Չեք կարող ծառայել Աստծուն և մամոնային» (հմմտ. Մատթ. 6:24): Բացի դրանից՝ Նոր Կտակարանի ողջ փիլիսոփայությունը հավաստում է, որ մեր վերջնական քաղաքացիությունը երկնային է. «Դուք ինչպե՛ս կարող եք հավատալ, քանի որ իրարից եք փառք առնում և չեք որոնում այն փառքը, որ միակ Աստծուց է գալիս» (Հովհ. 5:44): Ընդամենը Աստծու պատվիրանները չարամտորեն պահելն օրինազանցություն է, իսկ հակառակության ոգու հետ համատեղելը՝ հերետիկոսություն. «Դուք եք երկրի աղը. սակայն եթե աղը անհամաճի, ինչի՞նչի այն կաղվի. այնուհետև ոչ մի բանի պիտանի չի լինի, այլ միայն դուրս կթափվի և մարդկանց ոտքի կոխան կլինի: Դուք եք աշխարհի լույսը. մի քաղաք, որ լեռան վրա է կանգնած, չի կարող թաքնվել: Թող այդպես փայլի ձեր լույսը մարդկանց առաջ» (Մատթ. 5. 13–15): «Մի՛ խաբվեք. վատ խոսքերը ապականում են լավ բարքերը: Սթափվեցե՛ք արդար մարդկանց նման և մեղք մի՛ գործեք. որովհետև ոմանք չունեն Աստծու ճանաչումը...» (Ա Կորնթ. 15.33–34),— հորդորում է Պողոս առաքյալը: Ուստի, ինչպես դարձյալ համոզվում ենք, անթույլատրելի է կեղծավորաբար ու ինքնաարդարանալով կամ ինքն իրեն մերում շնորհելով՝ այլոց դատապարտության մատնելը (հմմտ. Սաղմ. 140.4): Միաժամանակ փաստելի է, որ «որտեղ կա հավասարություն, այնտեղ չի կարող լինել խաղաղություն, լի-

նի դա ժողովրդավարություն թե միաժամանակյա ղեկավարում» (Հ. Ոսկեբերան), ինչպես նաև եթե մի ընդհանրության մեջ հանուրի շահերը ներկայացնելու կոչված որևէ անձ կարող է շարունակական կերպով կասկածի տակ առնել սեփական սրբություններն ու անպատիժ մնալ, հոգևոր դիտակետից նշանակում է՝ տվյալ հանրությունը տառապում է «հավաքական հաշմանդամությամբ»:

Այս առումով բավական ուշագրավ են Ընհանրական Եկեղեցու սուրբ հայրերից Դիոնիսիոս Արիոպագացու և Հովհան Ոսկեբերանի դիտարկումները: Այսպես՝ մարդուն արարելիս Աստված ի սկզբանե նվիրաբերեց բնական օրենքը: Ինչ է բնական օրենքը. Աստված դրոշմել է մեր մեջ խիղճը և բարու ու չարի ճանաչողությունը դարձրել բնածին: Կարիք չկա ուսանելու, որ պոռնկությունը չարիք է, իսկ մաքրագործությունը՝ բարիք: Մենք դա գիտենք ի սկզբանե: «Համոզվելու համար՝ օրենսդիրը հետագայում օրենքներ տվեց և ասաց. «Մի՛ սպանիր» (Ելք 20. 13), չավելացրեց, որ սպանությունը չարիք է, այլ պարզապես ասաց՝ «Մի՛ սպանիր»: Միայն մեղքն արգելեց և այլևս չուսուցանեց դրա մասին: Քանի որ խիղճը մեզ նախապես սովորեցրել է այդ: Բայց երբ խոսում է մեկ այլ պատվիրանի մասին, որը մեզ բացահայտված չէ խղճով, ապա ոչ միայն արգելում է, այլև հիմնավորումն է տալիս: Ուստի, օրենք դնելով շաբաթ օրվա համար և ասելով՝ «յոթերորդ օրը ոչինչ մի՛ արեք», հավելում է և պատճառը. «Աստված յոթերորդ օրը հանգստացավ իր բոլոր գործերից, որոնք նա արեց» (հմմտ. Ծննդ. 2. 22, Ելք 20. 10–11, Բ Ծր. 24.18):

Արդարության ամենամեծ հաղթանակը տեղի կունենա Վերջին դատաստանի ժամանակ, երբ Տերը կհատուցի յուրաքանչյուրին ըստ իր գործերի. «Հավիտենական կյանք է տալու նրանց, ովքեր, բարի գործերի մեջ հարատևելով, փառք, պատիվ և անմահություն են փնտրում, իսկ բարկություն և վրդովմունք՝ նրանց, ովքեր հակառակվում են, չեն հնազանդվում ճշմարտությանը և անիրավության հետևից են գնում...» (Հռոմ. 2.6–8):

Խաահակ վրդ. ՊՈՂՈՍՅԱՆ

Աստուծոյ Օրէնքներուն եւ պատուիրաններուն մասին

← էջ 6

Հինգերորդ՝ դրախտին մէջ դնել զինք [մարդուն] պահպանելու եւ վայելելու համար: Վեցերորդ՝ մեղանշելն ետք չպատժել: Եօթներորդ՝ զանազան ծրի շնորհքներով զարդարել: Ութերորդ եւ ծայրագոյնը՝ ժամանակին Իր Միածին Որդին դրկելը, Անոր մարմին առնելը եւ մեզի համար բոլոր տնօրէնութիւնները կատարելը մինչև խաչ ու չարչարանքներ: Ասոնք մեծամեծ եւ մտածելի բարերարութիւններ են, որոնք մարդս կը մղեն զԱստուած սիրելու ամբողջ սիրտով, քանի որ ոչ ոք կրնայ զԱստուած ամբողջ սիրտով սիրել, երբ իր սիրտը բաժնած է աշխարհին եւ Աստուծոյ միջև, ինչպէս կ'ըսէ Ս. Յովհան Ոսկեբերանը: Դարձեալ՝ Աստուծոյ բարութիւնն ու քաղցրութիւնը մեզ կը մղեն սիրելու զինք, քանի որ եթէ ծնողները սիրելի ու պատուելի են միայն մարմին տալուն համար, ապա ինչքան սիրելի է Աստուած, որ մարմինն ու հոգին ստեղծեց: Դարձեալ՝ ան է աւելի շատ սիրելի, ով աւելի կը դիրքացնէ, իսկ Աստուծոյ մօտ կը գտնուի ամենայի, անտաղտուկ եւ համեստ դիրքութիւնը, որ բոլոր դիրքութիւններուն վախճանն ու ծայրն է, հետևաբար աւելի սիրելի է: Դարձեալ՝ ինչպէս բոլոր ջուրերը ծովէն կ'ելլեն եւ ծով կը վերադառնան, այդպէս ալ մեր սիրոյն պատճառն ու նախագաղափարը Աստուած է, հետևաբար դէպի Ան պէտք է դառնայ իբրև սիրոյ սկիզբն ու աղբիւրը: Ուստի Սուրբ Յովհաննէս աւետարանիչը ըսաւ, թէ՛ զԱստուած սիրեցէք, որովհետև նախ Ա՛ն սիրեց մեզ եւ Իր Միածին Որդին՝ Փրկիչ Յիսուսը դրկեց: Դարձեալ՝ բոլոր օրէնսդիրներուն մէջ միայն Աստուած անսխալելի Օրէնսդիր է, որ օրէնքը տուած ատեն շնորհքն ալ որպէս օգնական տուաւ եւ կատարողներուն փառք խոստացաւ: Ուստի Քրիստոս՝ մեր Օրէնսդիր-

ը, ըսաւ, թէ՛ ով որ պատուիրաններս ունի եւ կը պահէ զանոնք, ան է, որ զիս կը սիրէ, իսկ ով, որ կը սիրէ զիս, Հօրմէս պիտի սիրուի, եւ ես պիտի սիրեմ զինք ու Ինքզինքս ցոյց պիտի տամ անոր: Արդ, ըսելով, թէ՛ ով որ պատուիրաններս ունի, ցոյց կու տայ օրէնքին ու Օրէնսդիրին անսխալութիւնը: Իսկ ըսելով, թէ՛ ով որ կը պահէ զանոնք, ան է, որ կը սիրէ զիս, ցոյց կու տայ Իր շնորհքներուն օգնականութիւնը, քանի որ առանց շնորհքներու ոչ ոք կրնայ Քրիստոսի օրէնքները պահել եւ սիրել զինք: Իսկ ըսելով, թէ՛ Իմ Հայրս պիտի սիրէ զինք, եւ ես ալ պիտի սիրեմ ու Ինքզինքս պիտի յայտնեմ անոր, ցոյց կու տայ հանդերձեալ կեանքին փառքը: Դարձեալ՝ զԱստուած սիրողներուն նշանը, ինչպէս առաքեալը կ'ըսէ, ամեն ինչի մէջ բարիքն գործակից ըլլալն է, որովհետև ոչ ոք, մահացու մեղքերու մէջ ըլլալով, կրնայ զԱստուած սիրել ամբողջ սիրտով ու բարիքն գործակից ըլլալ, այլ պէտք է հոգին դատարկէ մեղքերէն, որպէսզի Աստուծոյ սիրով լեցնի: Դարձեալ՝ զԱստուած սիրողը Աստուծոյ՝ իր Սիրելիին համար կը համբերէ ու կը տանի բոլոր վիշտերը, որովհետև Աբրահամ Աստուծոյ համար իր որդին իսկ չխնայեց. Յօր երանելին այնքան սարսափելի մեղութիւններու համբերեց [Աստուծոյ համար]. իսկ առաքեալները եւ բոլոր սուրբ մարտիրոսները իրենց արիւնը թափեցին Աստուծոյ համար: Քանի որ Աստուծոյ սէրը բնութենէն գեր ի վեր կ'առնէ մարդուն յօժարութիւնը, որովհետև գերազանց սիրոյ զօրութիւնը մոռցնել կու տայ տկարութիւնը: Ի վերջոյ, զԱստուած սիրելու կերպը սիրելն է զԻնք առանց կերպի՝ ամեն ինչ վերաբերելով Աստուծոյ փառքին: Աստուծո՛ւ բացի՝ ինչ որ սիրես, կը զգուիս եւ շատ կը ձանձրանաս. իսկ եթէ միայն զԱստուած սիրես, ինչքան սիրես, կը քաղցրանաս:

Տասներորդ հարցում. *Ընկերը սիրելու մասին:* Ընկերը սիրելու հրամանը այս է. պիտի սիրես քու ընկերդ՝ իբրև քու անդ: Աստուծո՛ւ եւ մեր հոգիէն ու մարմինէն ետք սիրելիներ են մեր ընկերները, որովհետև այս *իբրև* ոչ թէ հաւասարութեան անուն է, այլ նմանութեան, որ կ'ուզէ ըսել, թէ՛ քու անծիրդ պէս. իսկ նմանը նոյնէն պակաս է. քանի որ ամբողջութեամբ նմանը նոյն է, սակայն ոչ ոք կրնայ ամբողջութեամբ սիրել ընկերը այնքան, որ իր հետ մինչը ըլլայ: Արդ, ընկերը սիրելի է Աստուծո՛ւ եւ մեր հոգիէն ետք, այլ ոչ թէ մեր մարմինէն ետք, որ մեր մարմինը սիրելով՝ ընկերոջ հոգիին վնաս կը պատճառենք. սակայն ընկերոջ հոգիին փրկութեան համար պարտական ենք մեր մարմինը չխնայել: Որովհետև ըստ առաքեալին՝ Քրիստոս Իր անձը մեզի համար դրաւ, եւ մենք պարտաւոր ենք մեր անձերը դնել մեր եղբայրներուն համար: Պօղոս թէև զԱստուած շատ կը սիրէ եւ գիտէր, թէ երբ աշխարհէն ելլէ, Աստուծոյ մօտ պիտի մտնէ, սակայն իր ազգին փրկութեան սիրոյն կը կամենար Քրիստոսէ նզովուիլ, այսինքն՝ որոշ ժամանակ մը մնալ այս աշխարհին մէջ, մինչև տեսնէր հրեաներուն դարձը առ Աստուած: Արդ, բազմաթիւ բաներ կը յորդորեն մեզի մեր ընկերը սիրել: Նախ՝ բնութիւնը, որովհետև նմանը իր նմանը կը սիրէ: Երկրորդ՝ օգնականութիւնը, ինչպէս Պօղոս կ'ըսէ, թէ իրարու բերը վերցուցէք: Երրորդ՝ եղբայրութիւնը, որ բոլորս ալ մէկ Աղամի որդիներն ենք, իսկ Սուրբ Աւագանով Աստուծոյ որդիներ եւ իրարու եղբայրներ: Չորրորդ՝ մէկ մօր համար, որ է Սուրբ Եկեղեցին: Հինգերորդ՝ մէկ հաւատքի շուրջ միաբանութեան, մէկ Աստուծոյ եւ մէկ մկրտութեան: Վեցերորդ՝ մէկ փառքի համար, որ է Աստուծոյ տեսութիւնը:

Եօթներորդ՝ մարդասպանութենէ ազատուելու համար, որովհետև ով, որ իր եղբայրը չի սիրեր, մարդասպան է, կ'ըսէ Ս. Յովհաննէս աւետարանիչը: Ութերորդ՝ մեղքերէ ազատուելու համար, քանի որ ով իր եղբայրը չի սիրեր, տակաւին նոյն մեղքերուն մէջ է, կ'ըսէ նոյն աւետարանիչը: Իններորդ՝ Քրիստոսի նմանութեան համար, որովհետև ինչպէս Ան մեզ սիրեց, նմանապէս մենք պէտք է մեր եղբայրներն ու ընկերները հոգևոր սիրով սիրենք: Տասներորդ՝ մեղքերէն դարձնելու եւ Աստուծոյ շնորհքներուն մօտեցնելու համար. այն է կատարեալ եղբայրական սէրը, եւ այն կը ստրկիմք հրեշտակներէն, որոնք միշտ կը կամենան մեր մեղքերէն դարձը: Իսկ ան, որ իր ընկերը կը սիրէ, բազմաթիւ բարութիւններու կը հանդիպի: Նախ՝ կը յաղթէ թշնամիին, որովհետև եթէ մէկը բռնուի, երկուքը կրնան դէմ կենալ, հակառակի, կ'ըսէ Սողոմոնը: Երկրորդ՝ քանի որ իր պակասութիւնը ընկերոջ բարիքներով կը լեցուի, ինչպէս կ'ըսէ վարդապետ մը, թէ՛ վերցնու մախանձող, եւ քուկո՛ւ է, ինչ որ ունիմ. վերցնեն մախանձս, եւ իմս է, ինչ որ ունիս: Երրորդ՝ խնդրածներու կատարումը. որովհետև եթէ երկրի վրայ երկու հոգի միաբան ըլլան, Աստուծո՛ւ կ'առնեն ինչ բարի բան, որ կը խնդրեն: Եթէ եղբայրները զիրար սիրեն, որ մարդէ մը ծնած են. հոգիով եղբայրները պէտք է սիրել, որովհետև Աստուծոյ որդիներ են:

Յակոբ Պատրիարք Նալեան.
«Քրիստոնէական Ուսանելի»,
1806

Աշխարհաբարի վերածեց
Վարանդ (Յակոբ) ՔՐԻՍՏՈՆՅԱՆԸ

Հայորդու բարոյատիպը Ատոմ Յարճանյանի ռազմերգութեան մէջ

← էջ 4, 6

Օ՛ր, փառք քեզի և փառք շանթարմատ հպարտությանը քու լեռներուդ,
Կարծես անոնց ապառաժներուն հավիտենական տարրերն են կառուցված՝
Անպարտելի հասակները քու սևահեր ու հրաշլի որդիներուդ,
Քու անտառներուդ ահագնաթափ փոթորիկը գիշերական...
Անոնց զինվորայլի կուրծքերուն մէջ իր հսկայական հեքը դրալ...

Սիամանթոյի ռազմերգությանը ներհատուկ հատկանիշներից է սքանչացումը հայորդու պայքարի հանդեպ: Ասպետի կերպարը նրա պոեզիայում հոգեբանական գաղափարատիպ է՝ օժտված իր ցեղի նախնական հոգեգծերով: Դարերի ստրկության մէջ իր նախաստեղծ դիմագիծը կորցնելու չափ խեղճացած ժողովրդի հոգեբանությանը հայորդու վարքը վերադարձրեց ցեղական կորովը, շանթակիր տարերքը, գերիզոր կամքն ու անկարելիության աստիճանի ներքին զորությունը: Սիամանթոյի հայորդին իր ցեղի գտարյուն տեսակն է, ցեղի ուժակիրն ու բարոյատիպը.

Ձեր աստվածացումը օրհներգելով պիտի երիվարեն,
ահավափիկ,
Ո՛վ գիտե, դէպի որ հաղթանակները կամ դէպի որ պարտությունները փառավոր:

Սիամանթոն որքան հայրենապաշտ, նույնքան էլ արիապաշտ բանաստեղծ է: Ազգային գոյաբանության ոգորումների ճանապարհին հասունացած բանաստեղծի ռազմերգությունը նախականավորական շարժման շրջանում մրկեց հոգիներ, պողպատեց կամքեր, ձևավորեց դյուցազնատիպ մի սերունդ, որ ազգային աննախադեպ կորուստների ու ողբերգությունների կողքին կերտեց անօրինակ հերոսացումների փառահեղ դյուցազնավայեր:

«Ես երգելով կուզեմ մեռնիլ» բանաստեղծության մէջ քերթողն ու ռազմիկը խորհրդանշում են գաղափարն ու կամքը, ոգին և ուժը: Ընդհանուր են հոգու խռովքը, սխրագործելու գիտակցությունը, նպատակը կերտելու կամքը: Հայ ռազմիկի աստվածակերպ կերտվածքը ոգեղենացնող է: Պահը խորհրդավոր է. հայրենիքի համար գերագույն պարտավորություն ունեն թէ բանաստեղծը, թէ ռազմիկը.

Եվ դուն սա մաքրափայլ թերթերուդ վրան, ցեղին ցավը և ցեղին ուժը բանաստեղծես...

Ես որբ մըն եմ և ըմբոստ մը, մնաս բարյալ, կորուսյալներս փնտրելու կերթամ...
Քու երգերեդ երգ մը տուր ինձ, երգ մը, ես երգելով կուզեմ մեռնիլ...

Խորհրդապաշտության սահմանին հասնող հիացմունքը, ցավախառն ցասումը, բարձր բարոյականը, խռովահույզ ապրումների գիշերված մեջ հայտնված ռազմիկի կիսաստվածային կերպարանը հաստատում են կյանքի դյուցազնորենը.

Ապաստմիս և Հույսիս քաղցրությանը հետ, միմակ էի այդ իրիկուն,
Եվ Փրկության ու Տառապանքի նժարովը՝ Հայրենիքին բախտը կը կշռեի...
Երբ հեռակա տանն դուռը, գիշերված սարսափին մեջեն,
ուժգնապես բախեցին.
Եվ ժպտուն՝ ընկեր մը ներս մտավ, շքեղորեն գեղեցիկ,
եղբայրադեմ ու ահավոր...
Երիտասարդ էր: Աչվներուն կայծը, երկնքի աստղերն էր,
որ կը ծորեր,
Եվ հասակին ձևերը մարմարներու զորություններն էր կերտված...
Իր ծանրախոհ գրվաթ սգավոր կիսաստվածի մը արյունոտ սրտին կը նմաներ...

Սիամանթոյի ռազմերգությունը հաստատում է ազգային անընդմեջ ողբերգություններով սրբազրված կյանքի օրենքը. «Ցավը արցունքով չէ որ կ'անհետի»: «Հույսով գեղուն, արևով խենթ և անուրջով երջանիկ» բանաստեղծի կյանքի գերնպատակը հայրենիքի գոյաբանությունն է. «Ինձի համար կարելի չէ... Հայրենիքիս մահացումը»՝ այդ ճանապարհին հաղթահարելով կամքի բոլոր թուլությունները, բարոյապէս զոհելով երկրային կարոտները. «Նպատակս տկարություն չի ճանչնար»: Սիամանթոն հայդուկային շարժման ժամանակակիցն է, գաղափարակիրը «Մահ կամ ազատություն» նշանաբանի.

Արարատին փառքերեն, Արագածեն ալ անդին,
Մենք արևներ պիտի հագնինք և արյուններ...

Այսպիսի կենարար լույսով են պսակվում բանաստեղծի ռազմերգերը: Հույսը մշտապէս ճառագում է նպատակի վերջնականում, հույսն ամփստելի է, ինչպէս ցայգին հաջորդող արևագալը. «Հայ զինվորին պղինձե շեփորը պիտի պատռի հաղթանակի Ռազմերգին որոտումն...»:

Մաքառումի և անկշռելի ցավի մատյան է Սիամանթոյի

քերթությունը: Հզոր երևակայությունը, բանաստեղծական անսահման տարերքը, խոսքի գաղափարաբանական ներքին կշիռը բանաստեղծական աշխարհում հաստատեցին պոետական մոր դիմագիծ: Գեղարվեստական մտածողության որոշակի հատկանիշներ, գերազանցապէս մտապատկերների առկայությունը, պատկերների հյուսքը, վերացական ոգին նկատի ունենալով՝ քննադատությունը Սիամանթոյին դասել է խորհրդապաշտների շարքին. «Վեռնեի, Բողերի, Մալարմէի հայրենիքում նա չի կարող չենթարկվել այս սիմվոլիստ-դեկադենտների ազդեցությանը»,— դիտարկում է Վ. Նալբանդյանը՝ ստեղծագործական ակունքների հետ մատնանշելով Սիամանթոյի արվեստի խորհրդապաշտական ոգին: Խորհրդապաշտական հայեցողության ազդեցությամբ հանդերձ՝ խորհրդապաշտությունը Սիամանթոյի պոեզիայում գեղագիտական տիրական աշխարհայացք չդարձավ. «Անխառնորեն ռոմանթիկ է,— նկատում է Ա. Չոպանյանը,— իրմե ավելի ռոմանթիկ բանաստեղծ չենք ունեցած, նույնիսկ անոնց մէջ, որ պատմականորեն «ռոմանթիկ» կոչված շրջանի մէջ ապրած են»: Ստեղծագործական երեք մեթոդ՝ խորհրդապաշտությունը, գաղափարապաշտությունը և իրապաշտությունը, Յարճանյանի ժողովածուներում դրսևորվել են փոխներթափանցաբար՝ երբեմն տիրական դառնալով այս կամ այն չափով: «Վերժի մարտագոռ շեփորող և տառապանքի խելահեղ բանդագուշոջ» (Դ. Վարուժան),— այս տարերքի հակակշիռ ուժի մէջ է Սիամանթոյի արվեստի հզորությունը:

Նարինե ՀՈՎՀԱՆՆԻՍՅԱՆ, ք. գ. թ., դոցենտ

ՔՐԻՍՏՈՆՅԱ ԴԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝ Մայր Աթոռ Սուրբ Էջմիածին

Հրատարակիչ՝ «Քրիստոնյա Հայաստան»

թերթի խմբագրություն

Գլխավոր խմբագիր՝

Նարինե Հովհաննիսյան

Գրանցման վկայական՝ 624

Խմբագրության հասցեն՝ Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝ qristonyahayastan1@gmail.com

qristhay@etchmiadzin.am

web կայք՝ krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 15.05.2025 թ.

Տպաքանակը՝ 1265